

ያህይ ለዕዮ መናመተ ኣጉስ

ያህይ ለዕዮ መናመተ ከተበንቶኢሁ አመዕናኑት መሲህ ኢስ ቀርቼስ እሁስ አመዕንስ መሳን ቶቸሙለክ ኦርሸት ኢልቶስ ወክትዪት። ከተቦስህን ቡዕለ እኮ ጠዉ እነበባእረ ተብሶስ ዊመ እሆተ ጠረኝሲሃለክ ኢልቶስ ኦሪሸ ኣዜን አመዕነቶንከስ ጠረኝታገ አኢሃት።

መጻፍስ ኣዜን በተአኖስ አዲ ልግብለክ አዎዕናቀንት ዮእ መገኑ ለልሾስ ሶህኑተ አፎእሃን፤ መገኑ ለልሾስ ሶህኑት ህከን ዘማኔን ሄኦ አመዕናኑት ኤንኬዕንታኢሃ እክ ዋሎ መኒሃ እኮጎሬ ምስጥር ምስል ሃሊን ሆንጠኮእራጎ። መዝሙረ ፈንቀላንሲን ዬናህገን መጻፍስ ቡዕለ እኮ ጠዉ አደደ መገኑ ለሊሾስ ሶህኖ መሳን አደደ ደኒን በርጋቀም ሆንጠኮኡ። መጻፈስ ፈስርተኔሃ አደ እኮ ሰውቱ ሄዕዮሰጎሬ ቡዕለ እኮ ጠዉ ለልዮእሃን፤ ሁኩንን መገኑ ቀርቾሃ መሲህ አዲን ለንኪሃ በርግበ ሃሊን መቶረለክ ኤተሩ አዕይ ሸይጣኒን ሜጡበ ዲነ ጉዕመንከ ቄለኖ፤ ዲነ ቄሎች ኤተሮን አመዕነንቶስሆኑኡተ ሃዕሮ ሰማለክ ኡለተ ረገእሲስኖስ።

መጻፍስ አፎሃ

ኣጉስ (1፡1-8)

መገኑ ለሊሾስ ሶህኑት ፈንተኡለክ ለመለ መገን አመዕናኖ ዱእ ጭምት ምናች ሶህንቶ ሶህኑተ (1፡9—3፡22)

መጻፈስለክ ለመለ ማተበ (4፡1—8፡1)

ለመለ ጡሩምበ (8፡2—11፡19)

ደህቹለክ ለሙግዘ (12፡1—13፡18)

አደደ መገኑ ለሊሾስ ሶህኑተ (14፡1—15፡8)

ለመለ መገን ኡሙዕሬ ጠበትተ (16፡1-21)

ባብሎን በኡ፥ ቡሳውች፥ ክዝበኘ ነብዬችለክ እልቢስ ቄልተኡ (17፡1—20፡10)

ቂያመ ፍርደ (20፡11-15)

ሃዕሮ ሰማሃ፥ ሃዕሮ ኡለተ፥ ሃዕሮ ዬሩሳሌመ (21፡1—22፡5)

መጨረሻስ ሰውት (22፡6-21)

¹ ኩ መገኑ ለሊሾስ ሶህኑት ግደኖ ወክቱን እሆኖህ እሁስ ካዲማተስ ለሊሶተ መገኑ መሲህ ኢሲሃ ኣስዮሰሃን፤ መሲህ ኢሲን

መላይኬቹስ ሶክ ካዲሚሀስ ያህዪሃ ከ ሶህኑተ ለሊሾስ።

² ያህይን መገን ላገተኔሃለከ መሲህ ኢስ ሞስክር እህስተኔሃ ህትን ለሊሾስ ጠወ ጉዕመንከ መስከር።

³ ኩ ጠወ ጉዕሙንኩ እህኖ ወክቱ ግደኑ እኮቤቺሃ ከ ራግ ላገተ አነበበኖሁ ማስአሞእሃን፤ ህትን ከ ራግስ ላገተ ሞጮጭታእሩለከ ከን ራግ ላገ አዜን ከተበሞሃ አታእሩ ማስአንቶእሩን።

ለመላንከ እስይ አመዕናኖ ዱእ ሞናች ሶህሞ ወገሬትተኔሃ

⁴⁻⁵ ያህዪች እስይ ባደን ለመላንከ መገን አመዕናኖ ዱእ ጭምት ሞናች ዮሀኒች፡ ሄዕዮሀኒችለከ አሜተኖ መገኒች፡ ጄነትስ ቦርጭመ ብሬን ዮ ለመላ አያኒች፡ ህትን ሬሆች ኬኢን ሀንገፈ እኮ ኣዱንያ አል ዋመ ዳኛኑተ ገሽኖሃ፡ አመዕነሞ ሞስክር እኮ፡ ኢተኖህዕኔሀኒችለከ ቄጊንከስ ጩቢችኔ ነጠ ፋሼኔ መሲህ ኢሲች ኣስቱትለከ ወገሬቱ ክዕኔሃ እሁን።

⁶ መሲህ ኢስ አና መገኑ ካደሞተ መንግስትስ ኡመት ቂስተ አዕዮኔ መሲህ ኢሲሃ ኬዕምኙለከ ወልቀት ዘማንሃ ጉዕሚንከ ኢላ እሁን! ኣሚዕን።

⁷ መኑ ጉዕሙንኩ እሱ ቀሶሩ ፈቁዕናን ጎማን አሜተን ለኣእ፤ ህትን ኣዱንያ አሌን ዮ ኡመቱ ጉዕሙንኩ አሜትስተኔሃ ኦኣእ፤ ሁኩ ጠወ ሀንቅሃን፤ ኣሚዕን።

⁸ ጉዕመንከ አታለኖ ዋዕናሃ፡ ቲሁ ዮኢሁለከ አሜተኖ ቀርቼ መገኑ «ዋዕኔሁለከ ኤተሪሁ አኔት!» ዮና። *

መሲህ ያህዪሃ ለሊገ

⁹ እን አመክዕኔ ቤቱ ያህይ ኢስተኔሃ ኦሪሽተ ኣኡለከ አታዕሉሃ መገን ጄነት ኣጉሃ ክዕኔንን ሜጡበ ወጡ ዮኤሃን፤ እንን መሲህ ኢስ ዱዱብሴ መገን ላገተ ጠወዕዮምቤቺሃ ዊን ረበንቶ «ፍጥሞ» ዬኖ ባደን ሄዕዮም እቅ።

¹⁰⁻¹¹ ቀርቶ በሬን ጠሊላ አያኒን እክ ሄዕዮም ወክት ኤተርኤ አዲን «ከ ለኣንተሃ መጻፋን ከተብ፤ መጻፈስ ሕሰዩ ዬኖ ባደን ዮ ጌፊሶኒሃ፡ ሰምርኔሲሃ፡ ጴርጋሞኒሃ፡ ትያጥርኒሃ፡ ሰርዴሲሃ፡

1:4-5 ፋል. 3፡14፤ መና. 4፡5። **1:4-5** ኢሳ. 55፡4፤ መዝ. 89፡27። **1:6** ፋል. 19፡6፤ መና. 5፡10። **1:7** ዳን. 7፡13፤ ማቶ. 24፡30፤ ማር. 13፡26፤ ሉቃ. 21፡27፤

1 ተስ. 4፡17፤ ዘካ. 12፡10፤ ያህ. 19፡34-37። * **1:8** «ዋዕኔሁለከ ኤተሪሁ አኔት/» የመሞሁ አማርኛን አልፈለክ አሜገ፡- የኖሁ አማርኛን «ወዕኔ ሁ ፍደልገለከ ኤተር ለጉ» ፍደልገት፤ ህትን ግሬክ ባደ ፍደሊን ዋዕኔላከ ኤተር ፍደላ ዩሃን፤ ሁኩን ጉዕሙንኩ መገን ዋልቀ ኣዜን ሄኡስ ለሊሰና። **1:8** መና. 22፡13፤ ፋል. 3፡14።

ፊላደልፍያለክ ሎዶቅዮ፤ ዬኖ ለመላንከ ከተማን ዮ አመዕናኖ ዱእ ምን ጭምቲሃ ሶህ» ይታ ጡሩምብገ ዮ አበ ላገተ ሞጮጪፍም።

¹² ጠወዕዮኤ መንቹ ለኦተ ኤተር አደ ዘህ ለዕዮም ወክት ዋርቂን መክሴመ ለመለ ኩራዘ አፋሼኖህኒንከሰን ለዕዮም፤

¹³ ህከን ኩረዘ አፋሼኖህን በላን ሎከሰ ኢላ ቅራዕሩ ኦድኑተ ኦደዕይ ወዘነሰ ዋርቅ ቀበቶን ቆዕሬ መንቹ ቤቱ አጉደኖሃ ለዕዮም።

¹⁴ ቡዕሉሰለክ ሙሙሰ በረድገለክ ሱፍገ ዋጂሃ እቅ፤ ህትን እልሰ ገረ ለበነተ አጉዳ እቅ።

¹⁵ ሎከሰ ምዳች ገረ ክፈሊን መክሴመ ናሰ ዬኖ ብረት አጉደኖሃ እቅ፤ ላገሰ ፋማን ዛዘኖ ዊ ላገገ ዮእሃ እቅ።

¹⁶ መኬሰ አንጋን ለመለ ቤዜተ አፎ እቅ፤ እሰ አፌች ለሞ አዲን እጳሹ ሲፋ ፋለኖ እቅ፤ ህትን ሚንሰ ዊመ ኑሪን ለሊሰኖ አሪጋት እቅ።

¹⁷ አን እሱ ለዕዮንሰ ወክት ሬዮ መንገ እክ ሎከሰ ኣዜን ኡቦም፤ እኮጎሬ እሰን መኬሰ አንገተ አሌእ አዕይ «ዋጅቶት! ብሬሁለክ ኤተሪሁ አኔት።

¹⁸ አን ሄኣምሃን፤ አን ሬዮም እቅ፤ ጠዉ እኮጎሬ ቲሁ ዘላለሚሃ ሄኣምሃን፤ ህትን አን ሬሁተለክ አዛብ ፈናም ቁልፋ ዮኤ።

¹⁹ ቲሱ ለኣንቲሃ ዮኢሀለክ ከኒች ኤተርን አሜተኖሃ ለኣንቲሃ ከተብ።

²⁰ ዋርቂን መክሴመ ለመላንከ ኩራዘ አፋሼኖህንለክ መኬ አንጋን አፋን ለኣንት ለመላንከ ቤዜ ፍሳረት ከኒት፤ ለመሉ ቤዜት ለመላንከ መገን አመዕናኖ ጭምት ዱእ ምነተ መላይከ፤ ህትን ለመሉ ኩራዘ አፋሼኖሁ ለመላንከ መገን አመዕናኖ ጭምት ዱእተ ምነ» ዬኤ።

2

ኤፌሶን ባዶን መገን አመዕናኖ ዱእ ምናተ

¹ ኤፌሶን መገን አመዕናኖ ዱእ ምና መላይኬቺሃ «ለመል ቤዜተ መኬ አንጋን አፎሃለክ ለመለ ወርቅ ኩረዘ አፋሼኖህን በላን ፈንቀላመኖሁ፤

² ሆጉክ፥ አጸንታንትገለክ አታዕሉክ ደጋም፤ ጠዉ እኮጎሬ ሂላኑተ አታሉ ሆጉክ ህትን አሳበኤ እኩዕናን <አሳበታን> ይታ መነ ክዘበኛኑተ እኮገ አጥራመት ደጉክ ደጎም።

1:13 ዳን. 7:13፤ 10:5። **1:14** ዳን. 7:9፤ 10:6። **1:15** ሕዝ. 1:24፤ 43:2።

1:17 ኢሳ. 44:6፤ 48:12፤ መና. 2:8፤ 22:13።

3 አታዕሊን ጠረፍክለክ ሱዕምኤተኔሃ ህፈቱዕናን ኦርሸተ ቶጉክ ደጎም፤

4 ጠዉ እኩጎሬ መቱ ግባንኬ ጠዉ ዮኢሁ ወዕና ዮሄ ኢተተ አጉርቶንት።

5 ሀከኔ ኡቦንት ጎር ሰውይት ቶበት! ወዕና አተን ሄኑንት ሆጉክ አእ፤ ሀካን ጉዕመንከ አትበጎሬ ኪቤቹ አሜታም፤ ቶበትበጎሬ ኩረዘ አፋሼኖሃ ቤቹቶሰ ኬሽ ከማም።

6 ጠዉ እኩጎሬሁ አን ግቦምገን ንቆላዉያኑት አታ ሆጉተ ግቡክ ጡመሃን።

7 «መገን አያኑ መገን አመዕናኖ ጭምት ዱእ ምናተ የኖሃ መጨት ዮሲሁ ሞጮጩን! «ድለ አዕዮሀኒሃ መገን ቤቸን ፎሎጬኖ ቤቸን ነጄ ሄእ ሀቂቸ ላልቹ አተኖገ አኣም» የኖት» ይት ከተብ።

ሰምርኔስ መገን አምዕናኖ ዱእ ምናተ

8 «ሰምርኔስ መገን አመዕናኖ ዱእ ምን መላይኬቼሃ፡-

«ዋኔሁለክ ኤተሪሃ እኮ፤ ሬዮሀኒቶለክ ፎሊን ዮሀኒቶ ሶሀንቶአተ፤

9 አርሸክለክ ቡጥመክ ደጋም፤ እሁን ቤሉ አት ቀባጣሙሃን፤ አይሁድ እኩዕናን አይሁድ አድረ ይታ ሼይጣን ምኒ እኮእሩ ሱዕመክ ክዘቢን ቤሳገ ደጋም።

10 ብርተ ዋሽት ኢልታሄ ኦርሸተ ዋጅቶት፤ እልቢሱ አመዕነቱክ ደጎተ ቶኑ በር ኦርሸተ ቶጎኖተ ክዕኔቶ መት-መቱክዕኔ ኡሱር ምኒ አግሰኖህዕኔ፤ አን ሽልማት ኣሴኖሀንገ ቄልቲነንተ ወጥ ሄኡ ኣሳንክዕኔቤቼሃ ሬቶኖተ ኢለ አመዕነንቲንተረ እኬ።

11 «መገን አያኑ መገን አመዕናኖ ጭምት ዱእ ምናተ የኖሃ መጨት ዮሲሁ ሞጮጩን!

«ድለ አዕዮሀኒሃ ለንክ ሬሆን ምርተአኖበአ የኖት» ይት ከተብ።

ጴርጋሞን ከተም መገን አምዕናኖ ዱእ ምናተ

12 «ጴርጋሞን መገን አመዕናኖ ዱእ ምን መላይኬቼሃ

«ለሞንከ አዲን ሙረኖ እጳሽ ሲፈ አፎ መንቹ

13 አት ሼይጣን ኬዕምኝ ቦርጭመት ዮቤቸን ሄኡክ ደጋም፤ እሁን ቤሉ ሱዕመኤ ጠረኝሰ አፎንት፤ ኢ አሌን ዮሄ አመዕነቱ ለገኑንትበአ፤ አመዕነም ኢ ምሰክር እኮ አንቲጳሴ ሽይጣኑ ሄአኖቤቸን ክዕኔ ከተማን ሼመ ወክት ኢን አመዕኑ ሆሮ አጉርቶንትበአ።

14 ጠዉ እኮጎሬሁ ግባንኬ መት-መቱ ጠዉ ዮሄ፤ ሁኩንን ባለአሜ ትምርት አዎንታ መት-መቱ መኑ በላንከክዕኔ ዮኡ፤ ኩ ባለአም እስራኤል ኡመት ሽርኬተ ክትሜመ ማለ እቲንለከ ዝነተ አኢን ቆዕልታገ ባለቄ ሸጦሃን።

15 ህትን ክዕኔ በላን ኒቆላውያኖ ትምርት ኣእት አዎንታ መኑ ዮኡ።

16 ህካን እኮቤቺሃ ቶበት፤ ህካን እህባች ኪቤቹ ደዕል አሜች አፌኤ ሲፊን ኦለማንሰ።

17 መገን እያኑ መገን አመዕናኖ ጭምት ዱእ ሞናተ የኖህ መጨት ዮሲሁ ሞጮጮን፤ ድለ አዕዮሀኒሃ ማጤመ መና ኣሳንሰ፤ ሃዕሮ ሱዕመ ከተበሞ ቀዉ ዋጂ ክኑ *ኣሳንሰ፤ ቶገኖ ኣን ቤሉ ካን አዪሁ ደገኖበአ የኖት ይት ከተብ።»

ትያጥርን ከተሞ መገን አመዕናኖ ዱእ ሞናተ

18 «ትያጥርን ከተሞ መገን አመዕናኖ ዱእ ሞነ መላይኬቺ

«ጊረ ለበነ አጉዳ እልትለከ ጊራን ሽልሴን መክሴመ መዳበ አጉዳ ሎከቲ ዮ መገን ቤቲች

19 «አን ሆጉክ፥ ኢተክ፥ አመዕነቱክ፥ ክድመክለከ አታዕሉክ፥ ደጋም፤ ህትን ወዕኔ ሆጎች ኤተርክ ሆጉት ቆካኢ።

20 ጠዉ እኮጎሬ መቱ ግባንኬ ጠዉ ዮኢሁ «አን ራጋንቸተ» ይታ መንቸተ ኤልዛቤል ኢ ካዲመት ዝነተ አቶተለከ ሽርኬተ ክትሜመ ክትም ማለ እቶተ ሉሲስ ተማርሰተን ሰዕምት አጉርቶንት።

21 አን ዝነተ እኡሴ ቶበት ፈንቀልታገ ወክት ኣሰዮንሴ እቅ፤ እኮጎሬ ዝነተ አጉሩ ግቦኡ።

22 ህካን እኮቤቺሃ ኣን እሴተ ኦርሽ መዕነ አሌን ኡጃንሴ፤ ህትን እሴንን ዝነተ አታ መኑ እሴ አታ ሂለ ሆጎች ቶበት ፈንቀሉ ሆጋረ አበ ኦርጨቀንታገ አኣም።

23 ኦሱሴ ሬሆን ቀጠኣም፤ † ህካን እኮቤቺሃ መገን አመዕናኖ ጭምት ዱእ ሞነት ጉዕሙንኩ መን ሰውትለከ ሄዕላቸሰ መረመር ደጋሚሁ ኤሳሃ እሁኤ ደጋኢ፤ ኣን መት-መቲሃክዕኔ ሆጎክዕኔ ጌሰ ኣሳም።

2:14 ዘኹ. 22፥5፤ 7፤ 31፥16፤ ዘዳ. 23፥4፤ ዘኹ. 25፥1-3። * 2:17 ቀዉ ዋጂ ክኡ፡- ግርክ ባዶን ብሬ ዘማን ፍርድ ሞኒ ዳኛኑት ኦጆ መንቸሃ ዋጂ ክኑ ኣሰቶሰጎሬ መንቸሰ ኦዳች ነጠ እህኖ። 2:17 ፋል. 16፥14-15፤ 16፥33-34፤ ያህ. 6፥48-50፤ ኢሳ. 62፥2፤ 65፥15። 2:20 1 ነገ. 16፥31፤ 2 ነገ. 9፥22፥30። † 2:23 ኦሱሴ ሬሆን ቀጠኣም፡- የኖሁ ልግቡ መኑ ህት ኦሱት እሴ እልቶአረበኢ፤ እሴ ትምርት ኣእት እሴ እካገ እከን ሄኣአረ ይታኡ።

24 «ትያጥርናን የንታሁለክ ከ ሂላ ትምርት ቶጌንበሀኑኡት ጉዕሚንከ ህትን መት-መቱ ሸይጣን ጥዕላሽ ምስጥር የኖሃ አዋንቶኑዕናን ፈቄንተ ክዕኔሃ ዋልት እጅነተ እጅሲሳንክዕኔበአ።

25 እኮጎሬ እን አሜቶተ ኢላ የህዕኔሃ ጠረኝሴን አፌ።

26 መጨረሻ ኢላ ድላ አዕዮሀኒሃ ሆጎንተእ ጠረኝኖሀኒሃ ኡመት ገሸኖ ሹምነቱ ኣሳንሰ።

27 «በረት በርቲን ጠቀኖሰ፤ ትብ ኦዳገ ቀጠቀጭ ቀመ አአኖሰ ኩ ሹምነቱ እን እኒቶኤ ቶጎምሀንጋት።

28 እን እሲሃ ሶዝ ቤዜተ ኣሳንሰ።

29 «መገን አያኑ መገን አመዕናኖ ጭምት ዱእ ምናተ የኖሃ መጨት ዮሲሁ ሞጮጩን የኖት» ይት ከተብ።

3

ሰርዴሰ መገን አመዕናኖ ዱእ ምናተ

1 «ሰርዴሰ መገን አመዕናኖ ዱእ ምን መላይኬቺሃ

«ለመለ መገን አያነለክ ለመል ቤዜት አፎሀኒቶ ጠወአሞዕሃን፤ ሆጉክ ደጋም፤ ጠለዕል ሱዕሙ ዮሄ ቤሉ አት ሬቶንት።

2 በቅይ፤ ሬሆተ ሆንጠኮሃለክ ፈቆሄ ቀዉ ወልቀክ ጠረኝሰ፤ መገን ብሬን ሆጉክ ዋመ እካን ደጎምበአ።

3 ህንዴ መ ተማርሴመሄጎር መ ሞጮጭቶንትጎር ሰውይ፤ አገርሰ፤ ቶበት፤ ጠዉ እኮጎሬ በቅ ይቱዕነ ድንገቴን ሞጋንቶገ አሜታም፤ መ ወክት ኪቤቹ አሜታምገ ደጋንትበአ።

4 ጠዉ እኮጎሬ ኦድኑሰ ንጃሰሶበአ ቀዉ መኑ ኪን ሜጡበ ሰርዴሰ ከተማን ዮኡ፤ እሰ ዋጂተ ኦድኑተ ኦደኡ * ሀሰሰኖሳሃ እኮቤቺሃ ዋጂተ ኦድኑተ ኦደኡ ኢን ሜጡበ መርታአ።

5 ድላ አዕዮሀኒሃ እሰገን ዋጂተ ኦድኑተ ኦድሴኖ፤ እን ሱዕመሰ እንኤለክ መላይክ ብሬን ሙንደዕይ ኩላም ቤሉ ሄእ መጻፊቶ ሱዕመሰ ቤሳምበአ።

6 «መገን አያኑ መገን አመዕናኖ ጭምት ዱእ ምኒሃ የኖሃ መጨት ዮሲሁ ሞጮጩን» የኖት ይት ከተብ።

ፊሌዴልፍ መገን አመዕናኖ ዱእ ምናተ

7 ፊሌዴልፍ መገን አመዕናኖ ዱእ ምን መላይኬቺሃ

3:3 ማቶ. 24፤43-44፤ ሉቃ. 12፤39-40፤ መና. 16፤15። * 3:4 ዋጂተ ኦድኑተ ኦደኡ፡- የኖሁ መኑ ኦደኡ ነጠ ኦድኑተ እሁዕነ ኦርሸተ ቄሎ መኒሃ መገኑ ኣሰኖ መሲህ ኢሲሃ ወገሬት። 3:5 ፋል. 32፤32-33፤ መዝ. 69፤28፤ መና. 20፤12፤ ማቶ. 10፤32፤ ሉቃ. 12፤8።

«ጠሊለላከ ሀንቅ እኮሀኒቸት፤ ህትን እሲንከ ደወዳ ቁልፋ ዮሲ እኮቤቸሃ እሰ ፈኛ ኡሩተ አዪሁ ጡፈኖበአ፤ ህትን እሰ ጡፎ ኡሩተ አዪሁ ፈነኖበአ።»

8 ሆጉክ ደጎም፤ አዪሁ ጡፎተ አታለኖበአ ኡሩተ ብሬክ አዕዮም፤ ዋልቀክ ቀዉ እሁሰ ደጎም፤ እሁን ቤሉ ላጋኤ አገርቶንት፤ ሱዕመኤ ካደንትበአ።

9 አይሁደ እኩዕናን አይሁድራን ይታእረ ህከ ሼይጣን ምኒ እኮ ከዝበኛኑት አሜት ሎከክ አሌን ኡብ ሰገዳሃገ አአም፤ እን ኢቱኤ ደጋገ አአም።

10 ፈረህ ይ አዘዣንኬ ላጋኤ አገርቶንትቤቸሃ አዳንያ አሌን ሄአኖሃ ጉዕመንከ ፊተንቶተ አሜታ ኦርሽ ወክቲች አገራንኬ።

11 እን ደዕል አሜታም፤ ህትን አዪሁ ኬሳሃ ዬመ ሽልማት አአኖሄበእገ ዮሄሃ ጠረኝሰ አጽ።

12 ድለ አዕዮሀኒሃ ዱእ ምኒ ቱቃ አአም፤ እሰን ህከኒች ሆሮ ፋለኖበአ፤ መገንኔ ሱዕመለከ መገን ከተም ሱዕመ እሰ አሌን ከተባም፤ ሁኩ ከተሙንኩ ሰሜች መገንኔ አዲች አሜታ ሃዕሮሃ ዬሩሳሌመ፤ ህትን ኢ ገይኤ ሃዕሮ ሱዕመ እሰ አሌን ከተባም።

13 ህትን «መገን አያኑ መገን አመዕናኖ ጭምት ዱእ ምናተ ዮኖሃ መጨት ዮሲሁ ሞጮጮን ዮኖት» ይት ከተብ።

ሎዶቅይ መገን አመዕናኖ ዱእ ምናተ

14 ሎዶቅይ መገን አመዕናኖ ዱእ ምኒ መላይኬቸሃ

«እሁን እኮሃ፡ አመዕነሞለከ ሀንቅ ምሰክር እኮሀኒች ህትን መገን ክልቀቲሃ ጉዕሚንከ ቡቁተ እኮሁ»

15 እሰን እን ሆጉክ ደጋም፤ አት ቅዘንትያበአ ህከረንገ እቦንትያበአ፤ ህካን እኮቤቸሃ ቂዘ ህከረንገ ኢባቡ እኮንት እቃ ጡመ እቅ።

16 ቂዘ ህከረንገ ኢባቡ እኩዕነ ልብጭ ይቶንትቤቸሃ አፌችኤ ፋሽ ቱ ዮሄታት።

17 አት ልገቡ ብሩ ዮኤ፤ ቀባጣሙሃን፤ ሆፈዕዮኤሁ መቱርቸሁ ዮኤበአ» ይታንቲት፤ ጠዉ እኮጎሬ ኦርሻሙ፡ ላፈ፡ ቡጥቹ፡ ቆቀለከ ከሉ እኮንትገ ደቅቶንትበአ።

18 እት ቀባጣሙ እኮተ ጊራን ሺል መኬ ዋርቀ ኢች ህዕርቶተ፡ ከልመክ ለልትበገ ድቦተ ዋጂ ኦድኑተ ህዕርቶተ ኦድኑተለክ ለኦተ እሌንከክ ቡዕርታንት እሌ ዘቡሃ ተ ህዕርቶ ቡዕርታንትገ ሸዛንኬ።

19 እን ኢታሞ መነ ጉዕመንከ ኡሙዕራሞ፤ ቀጠኣንሰ፤ ህካን እኮቤቺሃ ሰጭትኬእ ቶበት።

20 እን ኡሮን ኡር ጡፈ ቆጫሞ፤ አደሁ ላገእ ሞጮጭ ፈቕገሪ እሰቤቹ አግ እሲንን ሜጡበ እታሞ፤ ህትን እሰን ኢን ሜጡበ እተኖ።

21 እን ድለ አዕዮሀኒሃ አኒንከኤ ጄነትሰ ቦርጭማን አፋዕሌምሀንገን ህትን ቄሎሁ ጄነቲንኬኤ ቦርጭማን ኢን ሜጡበ አፋዕሊኖገ አኣሞ።

22 «መገን አያኑ መገን አመዕናኖ ጭምት ዱእ ሞናተ የኖሃ መጨት ዮሲሁ ሞጮጮን የኖት» ይት ከተብ።

4

ያህይ መገኑ ለዕዮገ

1 ህከኒች ኤተሮን ለዕዮንሰ፤ ሰማን ፈንተኦ ኡሩተ ሄኦ እቅ፤ ወዕና ሞጮጮም ጡሩምብገ ዮ ላገት «አም ከበ ፋል፤ ከኒች ኤተሪሃ እህኖ ጠወ ለሊሳንኬ» ዩእ።

2 ወክትንከሰ መገን አያኒን እክ ሰሜ ኬዕምኝ ቦርጭመ አሌን መቱ መንቹ አፋዕሌኢሃ ለዕዮም።

3 ኬዕምኝ ቦርጭማን አፋዕሌኢሁ ደኑሰ ኢያሰጵደለክ ሰርዲኖን ዩኖ ጤኦተ እኮ ክኑ አጉደኖ፤ ኬዕምኝ ቦርጭመተ ዘህ መርግድ ጤኦተ እኮ ክኑ አጉደኖ ሰመንዲቁት ሄኦ እቅ።

4 ህትን ኬዕምኝ ቦርጭመ ገበላን ዘህ ለሞይዲምኔ ሾልት ኬዕምኝ ቦርጭመት ሄኦ እቅ፤ ህትን ኬዕምኝ ቦርጭማን ዋጂ ኦድኑተ ኦድእ ቡዕላንከሰ ዋርቅ አክሊሊ ጣጦ ለሞይዲምኔ ሾልት ባልቀት አፋዕልቶ እቅ።

5 ኬዕምኝሰ ቦርጭማኝ በለቁለክ ላገት ጉገኛት ፋልታ እቅ፤ ጄነትሰ ቦርጭመ ብሬን ለመሉ ኩራዙ ለሊሰኖት እቅ፤ ሁኩ ለመሉንኩ ኩራዙ መገንየ አያን እቅ።

6 ህትን ጄነትሰ ቦርጭመ ብሬን ለአቃንቹ አጉደኖ ባሩ ሄዕዮ እቅ፤ ለአቃንቹንኩ ነጠ እኮእሃ እቅ፤ ጄነትሰ ቦርጭመተ ዘህ ብሬ

† **3:18** «አሌሀክ ደነ ቀጩ» የመሞ ፈሰረሞሁ ሀላብሳን «አሌ ዘቡ» የመሞኤ፤ መሰንትሰ ግሪክ አፎን «አሌ ዘቡ» የኖሃ ቤሉ ደነ ቀሲሃ ቡዕራኖሃበእ። **3:19** ሞሳ. 3፡12፤ አብ. 12፡6። **4:3** ሕዝ. 1፡26-28፤ 10፡1። **4:5** ፋል. 19፡16፤ መና. 8፡5፤ 11፡19፤ 16፡18፤ ሕዝ. 1፡13፤ መና. 1፡4፤ ዘካ. 4፡2።

አዲንለክ ኤተር አዲን ልግቡ እልት ዮ ሾሉ ፎላሙ ክልቀቱ ሄዕዮ እቅ።

7 እሰን ዎዕኔ ክልቀቱ ዘቦሃ አጉደኖ እቅ፤ ለንክሁ ቦረ አጉደኖሃ እቅ፤ ሰቂሁ መን ሚንተ አጉዳ ሚንት ሄኦስ እቅ፤ ህትን ሾልቂሁ ብር ዮኖ ዮብሮ አጉደኖ እቅ።

8 ህከን ሾሎንከ ፎላሞ ክልቀቱሃ መት-መትሀስ ሌህት ጎንት ዮስ እቅ፤ ህከን ጎኔን ኣዝ አዲንለክ ገበላን ዘህ ልግቡ እልት ዮስረ እቅ፤ እሰን

«ጠሊሉ! ጠሊሉ! ጠሊሉ!

ጉዕመንከ አታልታንት ቀርቾ መገኖ!

ዮኢሁ፥ ሄዕዮሁለክ አሜተኖሁ»

ይታን ሀንከዕርተለክ በራሃ ኡርሳበኣ እቅ።

9 ክልቀቱንኩ ኬዕምኝ ቦርጭማን አፋዕሌሀኒሃ ዘላለሚሃ ሄአኖሀኒሃ ሎርመት፥ ኬዕምኝለክ ሹኩር ሆንጠህሳ ወክት

10 ለሞዱምኔ ሾሎንኩ ባልቀት ዘላለሚሃ ሄአኖ ኬዕምኝ ቦርጭመ አሌን አፋዕሌ ኣን ብሬን ምኔንከሰ ኡብ ሰገዳኣ፤ ህትን ቡዕላንከሰ ዮ አክሊለ ፋሽት ኬዕምኝ ቦርጭመ ብሬን አፋሽት

11 «ኒ ቀርቾ መገኖ!

ጉዕመርቹንከ ከለቆንትቤቺሃ፥

ጉዕመርቹንኩ ከለቀሞሁለክ

ፎል ደአኖሚሁ ኪ አምሬን እኮቤቺሃ

ሎርመት፥ ኬዕምኝለክ ዋልቀት ኬሳሃ ሀስሳሄ» ይታ እቅ።

5

መጻፈለክ ሆልቶተኔሃ

1 ጄነት ቦርጭማን አፋዕሌሀን መኬ አንጋን ኣዝ አዲንለክ አብል አዲን ከተቤመ ለመለ ማተቢን አሸጌመ ጣጠሞ መጻፈ ለዕዮም።

2 መቱ ጠረፕ መላይኬቹ ሎረ ላጋን «ከ ማተብ ፊሎተለክ ጣጠሞ መጻፈ ፈኖተ ሀስሰኖሲሁ አዬት?» ዮን አዋጀኖሃ ለዕዮም።

3 ጠዉ እኮጎሬ ሰማን፥ ኡላንለክ ኡላች ኣዚን ጣጠሞ መጻፈ ፈኖተ ህከረንገ ኣዝሰ ለኦተ አታሎሁ አዪሁ ደገሞበኣ።

4 ኣንን ጣጠሞ መጻፈ ፈኖተ ህከረንገ ኣዝሰ ለኦተ አታለኖሁ ደገሙሆጎቤቺሃ አበ ኦዕዮም።

5 ህከ ወክት ባልቃች መቼ «አኦት! ይሁድ ዘሬች ደዉዴ ደቦች እኮሁ ድለ አዕዮቤቺሃ ጣጠሞ መጻፈለክ ለመለንከ ማተብ ፈኖተ አታለኖ» ዩኤ።

6 ህከኒች ኤተሮን ኬዕምኝ ቦርጭመ በላን ሾሎንከ ክልቀትለክ ለሞድምኔ ሾሎንከ ባልቀ በላን ጎረጠሞሃ አጉደኖ ሆልቼ ኡሬኢሃ ለዕዮም፤ ሁኩ ሆልቼ ለመሉ ቡዴለክ ለመልት እልት ሄኦስ እቅ፤ እሰን አዲንያ እል ጉዕመንከ ሶሃንቶ መገንዮ አያነ እቅ።

7 እሰን አሜች ኬዕምኝ ቦርጭማን አፋዕሌሀኒች መኬስ አንጋች ጣጠሞ መጻፈ ኣኤእ።

8 ጣጠሞ መጻፈ ኣኤ ወክት ሾሎንኩ ክልቀቱለክ ለሞድምኔ ሾሎንኩ ባልቀት ሆልቼ ብሬን ሚኔንከስ ጎምብሰንቶኡ፤ ጉዕመንኩስ ክራረ አፎ እቅ፤ ህትን ጠሊላኖ ዴእ እኮ ህጣነ ዊሞ ወርቅ ኦደተ አፎ እቅ፤

9 እሰን ሃዕሮ መዝመረ
«ቄጊንከክ ደቦች፥ አደደ አፎ ጠወኣ መኒች
ቦክችለክ ኡመቲች

መነ መገኒሃ ዋዚሃ
አት ጎረጠንቶንቲቤቺሃ
ጣጠሞ መጻፈ ኣኢሃለክ
ማተብ ፈኒሃ በቀኦንቲሃ እኮንት፤

10 መገኒሃኔ ቂስተለክ ዋመ
እካገ አቶንትሰ፤
ኡለ አሌን ዋመ እካእ» ይተን ዘመርቶኡ።

11 ህከ ቤቹ ለዕዮም ወክት ኬዕምኝ ቦርጭመተ፥ ክልቀትለክ ለሞድምኔ ሾሎንከ ባልቀተ ዘህ ልግቤ መላይክ ላገተ ሞጮጮም፤ በትኝሰን ዋለኤን አታሌንበ ጌስ እቅ።

12 ሎረ ላጋኒን
«ጎረጠሞ ሆልቺሃ ወልቀት፥ ቀባጡት
ሀይመተ፥ ጠረኝመተ፥ ሎርመተ፥ ኬዕምኝለክ
ገለት ቶጊሃ ሀሰሰኖስ» ይቶኡ።

13 ህትን ቴሱ ሰማንለክ ኡላን፥ ኡለች ኣዝ አዲንለክ ባር ኣዚን ጉዕመ ቤቾንን ዮ ክልቀቱ ጉዕመንኩ
«ኬዕምኝ ቦርጭማን አፋዕሌሀኒሃለክ ሆልቺሃ
ገለቱ፥ ሎርመተ፥ ኬዕምኝለክ ዋልቀት
ዘላለሚሃ እሲሃ እሁን» ይተን ሞጮጮም።

5:5 ክል. 49፥9፤ ኢሳ. 11፥1፤ 10። 5:6 ኢሳ. 53፥7፤ ዘካ. 4፥10። 5:8 መዝ. 141፥2። 5:9 መዝ. 33፥3፤ 98፥1፤ ኢሳ. 42፥10። 5:10 ፋል. 19፥6፤ መና. 1፥6። 5:11 ዳን. 7፥10።

14 ሾሎንኩ ክልቀቱ «አሚዕን!» ይቶኡ፤ ህትን ለሞድምኔ ሾልት ባልቀት ሚኔንከስ ጎምብሰንት ሰገደኡ።

6

ለመሉንኩ መጻፋ ፈንተኡስ

1 ህከኒች ኤተሮን ሆልቹ ለመለንከ ማተቢች ዋኔሲሃ ፈንን ለዕዮም፤ ህትን ሾሎንከ ክልቀቲች መቱስ ጉገኛገዮ ላጋን «አም!» የን ሞጮጮም።

2 ህትን ዋጁ ፋሹ ለዕዮም፤ ፋሹንከሰን ቆጶሁ በገዙ አፎ እቅ፤ አክሊሉንኩ አሰሞስ፤ እሰን ቄላንቹ እክ ድሊች ድለ አእን መሮ።

3 ህከኒች ኤተሮን ሆልቹ ለንክ ማተብ ፊል ፈቾ ወክት ለንክስ ክልቀቱ «አም!» የን ሞጮጮም።

4 ህትን ዋሉ ዳሙ ፋሹ ፋሎ፤ ህከን ፋሹን ቆጶህሲሃ ኣዱንያ አሊች ወገሬት ከማን ሙኑ ገገዪንከስ ሸቀንታገ አታ ዋልቀተለክ ሎሩ ሲፋንኩ አሰሞስ።

5 ህከኒች ኤተሮን ሆልቹ ሰቅ ማተብ ፊል ፈቾ ወክት ሰቅስ ክልቀቱ «አም!» የን ሞጮጮም፤ ህከኔን ጊለ ፋሹን ቆጶ መንቹ አንጋንከስ ሚዛን አፎሃ ለዕዮም።

6 ሾሎንከ ክልቀት በሊች አሚታኢሃ አጉዳ ላገተ ሞጮጮም፤ ህት ላገንት «ኪሎ ደሬ አለሱ መቶ በሬ ደሞዘ፤ መት ኪሉተ ደሬን እሀኖ ሶአ መቶ በሬ ደሞዘ እሁን፤ ጠፂ እኮጎሬ ወይነለክ ዘይተ ቤሶት!» የን ሞጮጮም።

7 ህከኒች ኤተሮን ሆልቹ ሾልቅ ማተብ ፊል ፈቾ ወክት ሾልቅ ክልቀት ላገተ «አም!» የን ሞጮጮም።

8 ህከ ወክት ሺሬ ፋሹ ለዕዮም፤ እሰንን ቆጶህን ሱዕሙስ ሬሁተ የመመኖ እቅ፤ አዛቡ አዎነኖሲት እቅ፤ ሬሁተለክ አዛቡ እሰን ኣዱንያ አል መኒች ሾልቅ አፎሃ ኦሊን፤ ጎሬን፤ ልግቤ ጥዘናንለክ አብል ቡሳዊን ሸቶተ ሹምነቱ አሰሞስ።

9 ሆልቹ ኦንትቅ ማተብ ፊል ፈቾ ወክት መገን ላገተለክ ኣቶ ምስክርቲኔሃ ሼመ መን ነብሳሃ መገኒሃ ክትሞ ሆንጠህሴኖ ጠረጴዚች ዋሮ አዲን ለዕዮም።

10 እሰን ሎረ ላጋን «ጠሊለለክ ሀንቅ ጉዕመንከ አታልታንቲ መገኖ! ኡላን ዮ መን አሌን ፈረዳንትበእሁለክ ቄግኔተኔንከ ገዱተ ፋልትባህ መ በር አላት!» ይተን ያርቶኡ።

11 መት-መቲሃስ ዋጁ ቀምብስ አሴመሰ፤ እስገን ሬታእሩ፡ እስገን ካዲመተ እኮ ኢተሰለከ አመሰ ኦሶ ዋሊንሹ ዊሞተ ኢላ ቀዉ ጌሰ ፎሎጭት ዲንክታገ ኩለሞሰ።

12 ህከኒች ኤተሮን ሆልቹ ሌህቅ ማተበ ፊል ፈኛን ለዕዮም ወክት ኡለት አበ ሌንቄቅቶኡ፤ ህትን አሪቹንት ጥጅ ኦድኖገ ትልመ ገምበለ እኮኡ፤ አገንቹንኩ ቄግገ ጉዕሙ ቤቹስ ቢሸዕዮ።

13 ከርሜን ጠረኝ ቦብሩ ኦድ ሀቄቹተ ሌንቄቅሻን ላልቹ ግግለኖህንገ ሰሜ ቤዜንት ኡለ አሌን ግግልቶኡ።

14 ሰሞንኩ ጣጠሞ መጻፍገ ጣጠሞ በዕዮ፤ ህትን ቆተትለከ ዊ በላን ዮ ኡለት ጉዕሙንኩ ቤቹችሰ ኬእ በኦኡ።

15 ህከኒች ኤተሮን ኣዲንያ አል ዳኛኑት፡ ሎርሎራኑት፡ በገዝ ሀለቀት፡ ቀባጣመት፡ ዋልቃመት፡ ርሰቹለከ ሰዋልድቹ ጉዕሙንኩ ሻንቃንለከ ቆተ አሌን ዮ ክን ረበ ኣዜን ገዪሀሰ ማጠንቶኡ።

16 እስን ቆተተለ ክነተ «ኒ አሌን ኡቤ! ኬዕምኝ ቦርጭመ አሌን አፋዕሌሀኒች ብርተ ሆልቹ ኡሙዕሬች ማጨኑ!»

17 እስ ሎሩ ኡሙዕሬ በሩ አሜቸቤቸሃ አይ ኡርተ አታለኖ?» ይቶኡ።

7

መት ጥብተ ሸይልኔ ሾሌ ኩሜ እስራኤል መነ

1 ህከኒች ኤተሮን ሾል መላይከት ሾሎንከ ኡለ ሙረባን ኡርታን ለዕዮም፤ እስ ኡለ አሌን እኮ ባራን ህከረንገ ሀቅ አሌን ቦብሩ ቦብርበገ ሾሎንከ አዲን አሜታ ኡለ አል ቦብረ አፎኡ።

2 ሄእኖ መገን ማተበ አፎ ዋሉ መላይኬቹ ሸርቂቹ አሜተን ለዕዮም፤ እስን ኡለተለከ ባረ ቤሶተ ዋልቀት ኣስንቶሰ ሾሎንከ መላይከቤቹ ላገሰ ጎት አዕይ

3 «መገን ካዲመ ሚኔን ማተበ አዕኖተ ኢላ ኡለተ እኮ ባረ ህከረንገ ሀቅ ቤሶኖቹ» ይ ያሮ።

4 እስራኤል ቶና ለሞንከ ደቦች ጉዕሚችን ሚኔንከሰ መገን ማተበ ዋቀሬመ መን ዋሊንሹ ጥብታ ሸይልኔ ሾሌ ኩሞተ እሁስ ሞጮጮም።

6:12 መና. 11፡13፤ 16፡18፤ ኢሳ. 13፡10፤ ኢዪ. 2፡10፤ 31፤ 3፡15፤ ማቶ. 24፡29፤ ማር. 13፡24-25፤ ሉቃ. 21፡25። 6:13 ኢሳ. 34፡4። 6:14 መና. 16፡20።

6:15 ኢሳ. 2፡19-21። 6:16 ሆሴ. 10፡8፤ ሉቃ. 23፡30። 6:17 ኢዪ. 2፡11፤ ሚል. 3፡2። 7:1 ኤር. 49፡36፤ ዳን. 7፡2፤ ዘካ. 6፡5። 7:3 ሕዝ. 9፡4፤ 6።

5 ማተቡ ዋቀረሞስሩ ይሁድ ደቦች ቶነ ለሞ ኩሞተ፥ ርቤሌ ደቦች ቶነ ለሙ ኩሞተ፥ ጋዴ ደቦች ቶነ ለሙ ኩሞተ፥

6 አሴር ደቦች ቶነ ለሙ ኩሞተ፥ ንፍታሌም ደቦች ቶነ ለሙ ኩሞተ፥ ሞናሴ ደቦች ቶነ ለሙ ኩሞተ፥

7 ሰሞኔ ደቦች ቶነ ለሙ ኩሞተ፥ ሌዌ ደቦች ቶነ ለሙ ኩሞተ፥ ይሳኮሬ ደቦች ቶነ ለሙ ኩሞተ፥

8 ዛብሎኔ ደቦች ቶነ ለሙ ኩሞተ፥ ዩሱፍ ደቦች ቶነ ለሙ ኩሞተለከ ቢንያሜ ደቦች ቶነ ለሞ ኩሞተ እቅ።

ዋጁተ ኦድኑተ ኦደኦ ልግብ ኡመት

9 ህከኒች ኤተሮን አዪሁ ዋለኦተ አታልቡ ልግብ ኡመት ለዕዮም፤ እሰን ኡመቲችለከ ደቦች፥ ዘሬችለከ አደደ አፎ ጠወአኖሀኒች ጉዕሚችን መኒች፥ ዘሬች፥ ባዲች፥ አደደ አፎን ጠወአ መኒች ጉዕሚችን ጭምይት ዋጁተ ኦድኑተ ኦደኦ እንጋንከሰ ዘሞባብ ሀበረ ኦፍ ዳኝነት ቦርጭመለከ ሆልች ብሬን ኡርቶ እቅ።

10 እሰን ሎረ ላጋን ጨንጭተን

«ጡምሱ ደኝነቲ ቦርጭማን አፋዕሌ ኒ መገኒሃለከ ሆልቺሃን»
ይታኢት እቅ።

11 መላይከት ጉዕሙንኩ ኬዕምኝ ቦርጭማንለከ ሾሎንከ ክልቀትሃ፥ ባልቂሃ ዘህት ኡርት ኬዕምኝ ቦርጭመ ብሬን ሚኔንከሰ ሙግይት መገኒሃ ሰገዶኡ።

12 እሰን

«አሚዕን! ሎርሱ፥ ሎርመት፥ ሀይመት፥ ገለቱ፥ ኬዕምኝ፥ ዋልቀቲለከ ጠረኝመቲ መገኒሃኔ ዘላለሚሃ ኢለ እሰሃ እሁን! አሚዕን» ይቶኡ።

13 ህከኒች ኤተሮን ባልቂች መቱ ኢ አደ ፈንቀል «ኩሩ ዋጁ ቀምብሰ ኦደኦ መቱ አይኤታን? እሰን ህከንቤቺች አሜቶአራን?» ይኤ።

14 እንን «ቀርቾ! እት ደጋንት» ዩንሰ፤ እሰን «ህከን አበ ኦሪሻች ፋልት አሜቶአራን፤ እሰን ኦድኑሰ ሆልች ቂጊን ሜጭት ዋጁ አቶአራን።

15 ህካን እኮቤቺሃ መገን ኬዕምኝ ቦርጭመ ብሬን ሀንከዕርተለከ በራሃ መገን ሞኔን ካደንታኢ፤ ህትን ኬዕምኝ ቦርጭማን አፋዕሌኢንኩ ሀላ እህኖሰ።

16 ከኒች ኤተሪሃ እስ ጎራይታበአ፤ ሰገብት አፋሰበአ፤ አሩ ህከረንገ ፋረት ኡልታሰበአ፤

17 ኬዕምኝ ቦርጭመ በላን ዮ ሆልቹ ዜማንቹስ እህኖ፤ ሄኦ ዊ ቡቆበ አዎንሰኖስ፤ መገኑ እሌችሰ እንጂጃተ ሺንሸኖ» ዩኤ።

8

ለመልቅ ማተቡ ፈንተኡስ

1 ሆልቹ ለመልቅ ማተቡ ፊል ፈቾ ወክት ሰኣት ደሬ ብከ ሰሞሁ ጨለ ዩኤ።

2 ህከኒች ኤተሮን መገን ብሬን ኡርቶ ለመለ መላይከተ ለዕዮም፤ እሳንከ ለመለ ጡሩምበ ኣሴመሰ።

3 ወርቅ ህጣን ኦዳተ አፎ ዋሉ መላይኬቹ አሜች ክትም ጠረጴዝ መዳን ኡሬእ፤ እሴንከ ኬዕምኝ ቦርጭመ ብሬን ዮ ዋርቂን መክሴመ ህጣን አጨሴኖ ጠረጴዝ አሌን ጠሊላኖ ዱኢን ሜጡብ ሆንጠህሰኖ ልግብ ህጣን ኣሴመሰ።

4 ህጣን ዉሊልት ጠሊላኖ ዱኢን ሜጡብ መላይኬች አንጋች መገን ብርታ ፋሎ።

5 ህከኒች ኤተሮን መላይኬቹ ህጣን ዋሬኖ ኦዳተ አፍ ክትም ጠረጴዞች ፊመ ዊንሸ ኡለተ ዋሽ ቶሬእ፤ በለቁ፤ ላገት፤ ጉገኛትለከ ኡለ ሌንቁቂሁ እኮ።

ጡሩምበ ቡስተኔሃ

6 ለመለ ጡሩምበ አፎ ለመሉንኩ መላይከት ጡሩምበስ ቡሶተ ቅጥ ይቶኡ።

7 ወዕኔ መላይኬቹ ጡሩምበስ ቡሾ ወክት በረደለከ ሰቅሜሹ ቄጉ ልቃልቀሞ ጊረተ እኮ፤ ኡለተ ዋል ቶረሞ፤ ኡለ ሰቅሜሹ ቡቦ፤ ህቅ ሰቅ አፎሁ ቡቦ፤ ለቶ ህጥት ጉዕሙንኩ ቡቦኡ።

8 ህከኒች ኤተሮን ለንክ መላይኬቹ ጡሩምበስ ቡሾ፤ ሎረ ቆተተ አጉደኖርቹ ቡቦን ባር ኣዜን ኡቦ፤ ባር ሰቅሜሹ ቄጉ እኮ፤

9 ባር ኣዜስ ሄኣ ነብሶሁ ዮስ ክልቀቲች ሰቅስ አፎሁ ሬዮ፤ ህትን ባር ዊ አሌን ዮ ሰፊናች ሰቅ አፎሁ በዕዮ።

7:16 ኢሳ. 49፡10። 7:17 መዝ. 23፡1፤ ሕዝ. 34፡23፤ መዝ. 23፡2፤ ኢሳ. 49፡10፤ 25፡8። 8:3 አሞ. 9፡1፤ ፋል. 30፡1-3። 8:5 ለዌ 16፡12፤ ሕዝ. 10፡2፤ ፋል. 19፡16፤ መና. 11፡19፤ 16፡18። 8:7 ፋል. 9፡23-35፤ ሕዝ. 38፡22።

10 ሰቅ መላይኬቹ ጡሩምበሰ ቡሾ፤ መብራትገ ለልሳ ሎረ ቤዜት ሰሜች ኡለተ ዋልት ኡቦኡ፤ ኡቦንኩ ዊ ሰቅ አፎንለከ ቡቆ አሌኒት።

11 ህከን ቤዜ ሱዕሙ «ቁዕረንዳ» ዬዮሃን፤ መሰንትሰ ዊ ሰቅሜሹ ቀራረናሃ እኮ፤ ውስ ቀራሮቤቹሃ ህከ ዋሃ አጎ ልግቡ መኑ ሬዮ።

12 ህከኒች ኤተሮን ሾልቅ መላይኬቹ ጡሩምበ ቡሾ፤ አሪ ሰቅ አፎሁ፥ አገንች ሰቅ አፎሁለከ ቤዜ ሰቅ አፎሁ ዋቀረሞ፤ ህካን እኮቤቹሃ እሰ ሰቅ አፎሁ ቱንሰቹ እኮ፤ ከን ሃሌን በሬ ሰቅሜሹለከ ሀንከዕሬ ሰቅሜሹ ኑሩ ዮበኢሃ እኮ።

13 ህከኒች ኤተሮን ለኣምረ መቼ ዩብሮ ሰሜ በላን ብርዮን ሎረ ላጋን «ፈቆ ሰሱንኩ መላይከት ጡሩምበ ቡሳ ወክት ኣዱንያ አሌን ሂኢ መኒሃ ቆሀኖህዕኔ! ቆሀኖህዕኔ! ቆሀኖህዕኔ!» ይተን ያርተን ሞጮጪሞ።

9

1 ኣንትቅ መላይኬቹ ጡሩምበ ቡሾ፤ ሰሜች ኡላን ኡቦ መት ቤዜት ለዕዮም፤ እሰንከ ሎረ ጥዕላሽ ኤሎ ፈኔኖ ቁልፈ ኣሴመሰ።

2 እሰ ሎረ ጥዕላሽ ኤሎ ፈኛ፤ ዉሊልት ሞዳቺች ፋልታሀንገ እክ ጥዕላሽ ኤሌች ፋሎ፤ ኤሌች ፋልቶ ዉሊሌ መሳን አርቹትለከ ሰሞሁ ቱንሰቹ እኮኡ።

3 ህከኒች ኤተሮን ከንቸፈሩ ውሊሌ ኣዚች ኡለ አሌን ፋሎ፤ እሳንከ ኡለ አሌን ዮ ግንጥ * ዋልቀገ ዮ ዋልቀተ ኣሴመሰ።

4 ኡለ አሌን ዮ ህጥተ እኮ እኮሰ ለቸርቹ ጉዕመንከ ህከረንገ እኮሰ ሀቀ ምዕርታበእገ ኩለሞሰ፤ ጠዉ እኮጎሬ ምዕሩ ሀሰሰኖሰ ሚኔንከሰ መገን ማተቡ ዮሰበእ መነሃት እቅ።

5 እሰ መነ ሽቱዕናን ኣንቱ አገነ ኦሪሶታትቤሉ ሽቶተ ፍቃድ ኣሴማሰበእ፤ ከንቸፈሩንኩ ኢሌሰ ኦርሸት ጊንጡ መነ ከረኖ ወክት ሞጮጪመኖሀኒጋት።

6 ህከ ወክት መኑ ሬሁ ሀሰኖ፤ ጠዉ እኮጎሬ ሬሁተ ደአኖበእ፤ እሰን ሬሁት ሄዕላታኢ፤ ጠዉ እኮጎሬ ሬሁት እሳች ሀንታኡ።

8:10 ኢሳ. 14፥12።

8:11 ኤር. 9፥15።

8:12 ኢሳ. 13፥10፤ ሕዝ. 32፥7፤

ኢዩ. 2፥10፤31፤ 3፥15።

9:2 ክል. 19፥28።

* 9:3 ግንጦ ዩ፥ ዱብንከሰ ከርኖ

መርዛሙ ዘቡዕሉተ ዩሃን።

9:3 ፋል. 10፥12-15።

9:4 ሕዝ. 9፥4።

9:6

ኢዩ. 3፥2፤ ኤር. 8፥3።

7 ሁኩ ከንቸፈሩ በገዚሃ ቅጥአኤመ ፋርሱተ አጉዳ እቅ፤ እሳንከ እክሊሊ አጉደኖሁ ቡዕለሰ ሄዕዮ እቅ፤ ህትን ሚንሰ መን ሚንተ አጉዳ እቅ፡፡

8 እሳንከ ሚንት ሙም አጉደኖ ሙሙ ሄዕዮሰ፤ እንኩሰ ዘቤ እንኩተ አጉዳ እቅ፡፡

9 ወዘናንከሰ ብረቲን መክሴመ ጌሬንጌሩ አጉደኖ ብረቱ ዮሰ እቅ፤ ህትን ጎኔሰ ላገት በገዚሃ ጅገን መርታ ልግቡ ፋርሱተለከ ኬዕምኝ ጋርት ሞጮጭሳ ላገተ አጉደኖ እቅ፡፡

10 እሳንከ ግንጥ ዱብገ ከረኖ ዱቡ ዮሰ፤ ህትን ዱቢንከሰ መነ ከርተን ኦንቱ እገነ ኢሊ ምርታ ወልቀት ዮሰ፡፡

11 ዎሙንኩ ዮሰ፤ እሰ ጥዕላሽ በውያ መላይኬቹ፤ ሱዕሙሰ ዕብራይስጥ አፎን አባደን ተ ግርክ አፎን አጳልዮነ ዬዮ፡፡

12 ዎኔ አዬ ዬዮ ኦርሸት ህጎኡ፤ ከኒች ኤተሪሃ ዎሉ ለሙ አዬ ዬዮ ኦርሸት አሜታኡ፡፡

13 ሌህቅ መላይኬቹ ጡሩምበ ቡሾ፤ መገን ብሬን ህጣነ አጪሲሃ ወርቂን መክሴመ ጠረጴዝ ሾሎ ቡዲች ፋልታ ላገተ ሞጮጮም፡፡

14 ት ላገት ጡሩምበ አፎ ሌህቅ መላይኬቹ «ሎረ ኤፍራጢሰ ዛዘኖ ዋን ኡሱረንቶ ሾሎንከ መላይከተ ገፈር!» ዬሰ፡፡

15 ህከን ሳኦቲንለከ ህከን በሬን፤ ህከን አገኒሃለከ ከን ዘማኒሃ ቅጥይቶ ሾሎንከ መላይከት መን ዘርተ ሰቅሜሽ ሽቶተ ገፈረንቶኡ፡፡

16 ፋሻንች ጎጎት ዋለንሹ ለሜ ጥቤ ምሎን እሁሰ ሞጮጮም፡፡

17 ህትን ፋርሱተለከ ፋርሶ አሌን ቆጶ መነ መናማን ለዕዮሚሁ ህትጎታን፤ ዎዘናንከሰ ኦደኦ ብረቲን መክሴመ ጌሬንጌሩ አጉደኖ ገረ ፊምገ ቢሽ፤ ገንበለ፤ ሰማሃ አጉደኖለከ ቡርቱካነ አጉደኖ እቅ፤ ህትን ፋርሶሰ ቡዕሉ ዘቤ ቡዕለ አጉደኖ፤ ህትን አፌችሰ ፋልታ ገረት ዉሊልትለከ ዲን ቶ ፋለኖ እቅ፡፡

18 አፌችሰ ፋልታ ገራን፤ ዉሊሊንለከ ዲኒን ህከን ሰሶንከ በላን መን ዘሬ ሰቅሜሹ ሬዮ፡፡

19 መሰንትሰ ፋርሶሰ ዎልቀት ዮኢሁ አፎንከሰለከ ዱብንከሳት እቅ፤ ዱቡሰ ዎርቹ አጉደኖ ቡዕላሙ እኮቤቺሃ መነ ምርታኢሁ እሰንት እቅ፡፡

20 ህከን በላን ሬቱዕነ ፈቆ መን ዘርት እንገሰ ሆጎች ፈንቀልት ቶበቶበእ፤ ሩሃንዪችለከ ወርቂች፤ ብሪች፤ ናሲች፤ ክኒችለከ ሀቂች

9:7 እዩ. 2:4፡፡ 9:8 እዩ. 1:16፡፡ 9:9 እዩ. 2:5፡፡ † 9:11 እባደነ፡ ዩ ኡዱምሳንቹ ዩሃን 9:13 ፋል. 30:1-3፡፡ ‡ 9:17 ዲን፡ ግርክ አፎን ዲን ክኑ እክ ቡርቱካን ደኑ ዮሰ፤ እሰን አበ ቡብኖሃለከ ሂሉ ቦበኖ ፎገሉ ዮሰሃን፡፡

መክሴመረ ለኡ ህከረንገ ሞጮጩ ህከረንገ ኦሮኡ አታልታበኢ ሸርኬተ ሰገዱ አጉርቶበኢ።

²¹ ህትን መነ ሹሃ፥ ኪሉሃ፥ ዝነተለከ ሞጉ ቶበት ፈንቀሉ ግቦኡ።

10

መላይኬቹለከ ቀዉ ሉህን ጣጠሞ መጻፈ

¹ ህከኒች ኤተሮን ጎመተ ኦደዕዮ ሞሉ ሎሩ ወልቀት ዮሰ መላይኬቹ ሰሜች ድረን ለዕዮም፤ ቡዕላንከሰ ሰመንዲቁት ሄኡ እቅ፤ ህትን ሚንሰ አሩለከ ሎከሰ ጊረ ቱቀ አጉዳ እቅ።

² ፈንተኦ ቀዉ ጣጠሞ መጻፈ አንጋንከሰ አፎ እቅ፤ መኬሰ ሎከተ ባር አሌን፥ ጉረሰ ሎከተ ኡለ አሌን አዕዮ፤

³ ቡርቀኖ ዘቤገ ላገሰ ጎት አዕይ ዎጀ፤ ዎጀ ወክት ለመሉንኩ ጉገኛት ላገሰ ሞጮጭሶኡ።

⁴ ለመሉንኩ ጉገኛት ላገሰ ሞጮጭሶ ወክት አን ከተቦተ እኮም፤ ጠዉ እኮጎሬ «ለመሉንኩ ጉገኛት ጠወኦኢሃ አሸግ ምሰጥርን ማጥ አፍ ቤሉ ከተቦት» ይታ ላገተ ሰሜች ሞጮጩም።

⁵ ህከኒች ኤተሮን ባራንለከ ኡለ አሌን ኡሬኢሃ ለዕዮም መላይኬቹ መኬሰ አንገተ ሰማ ዋሽ ኬሽ

⁶ ዘማኒሃ ጉዕሚሃ ሄኦኖ ሰማለከ እሰ ኣዜን ዮ ኡለተለከ እሴ ኣዜን ዮ ባረለከ እሰ ኣዜን ዮኢሃ ከለቆ መገን ሱዕሚን ጤሌዕለን «ከኒች ኤተሪሃ ዲንከኖበኢ!

⁷ ጠዉ እኮጎሬ ለመልቅ መላይኬቹ ጡሩምበሰ ቡሽ ሞጮጭሰኖ በር ካዲማተሰ ነብያኖተ ተሸት ላገተ ኩሎሰገን መገን ምሰጥሩ ዊመኖ» ዩእ።

⁸ ህከኒች ኤተሮን ዎዕናሃ ሰሜች ሞጮጩም ላገት «ባር አሌንለከ ኡለ አሌን ኡሬ መላይኬች አንጋች ዮኢሃለከ ፈንተዕዮ ጣጠሞ መጻፈ መርት ኣእ» ይ ለንኪሃ ጠወዕዮኡ።

⁹ ህካን እኮቤቺሃ መላይኬችበ መር «ቀዉ ጣጠሞ መጻፈ ኣሴኤ» ይ ጠዕሚምረ «ኣእት እት፤ አፎንከከ መለብገ ጤኦኖ፤ ጠዉ እኮጎሬ ጎደባንከከ ቀራረኖሃ እሀኖ» ዩእ።

¹⁰ ህከ ቀዉ ጣጠሞ መጻፈ መላይኬች አንጋች ኣእ እቻን አፌኤ ኣዜን መለብገ ጤዕዮኡ፤ ጠዉ እኮጎሬ እች ኬዕዮሚች ኤተሮን ጎደቡኤ ቀራረኖሃ እኮ።

11 ህከኒች ኤተሮን «ልግብያ መንተኔሃ፥ ኡመትተኔሃ፥ አደደ ላገተ ጠወኔ መንተኔሃለክ ዋመተኔሃ ለንኪሃ ራገ ጠወኡ ሀሰሰኖሄ» የመም ኩለሞኤ።

11

ለሞ ምስክርተኔሃ

1 ህከኒች ኤተሮን ኤሳሃ ብኪሃ ደግለለኖ በርትገ ዮ መቼ ብኬኖ ቶመ አሴማኤ፤ ኤሳሃ «ኬእ ዱእ ምኒላክ ክትመ ክትሚኖ ጠረጴዛ ብክ፤ ህከን ቤቸን ሰገዳእረ ወለእ፤

2 መገን ምኒች አብል አዲን ዮ ባዳተ ብክቶት፤ ሁኩ ቤቹ አይሁደ እኮበእ መኒሃ ኣሰሞሃ እኮቤቹሃ ብክቶት፤ አይሁደ እህቡ መኑ ጠሊልቹተ ከተመ ሸይልኔ ለሙ አገነ ፈንቀላንታሴ፤

3 ኢ ለሙንኩ ምስክሩ ጥጅ ኦድኑተ ኦደእ መቼ ኩሞተ ለም ጥብታ ሌሃሁ በር ራገ ኩልታገ ወልቀተ ኣሳንሰ» ይእ።

4 እሰ ኡለ ቀርች ብሬን ኡርታ ለሙንኩ ወርች ሀቃክትለክ ለሙንኩ ኩረዘ አፋሼኖሃን፤

5 አዪሁ እስተ ምዕርተ ሀሾ ጎሬ ጊረት አፌችሰ ፋልት ባለጋረሰ ቡሰታክ፤ ህትን እስተ ምርተ ሀሰኖሁ ጉዕሙንኩ ሬሀኖሁ ከን ሀለቲኒት።

6 እሰ ራገ ጠወኔ ህከ በር ሰሜች ጤኑ ኡበኖበእገ ሰማሃ ጡፎተ ወልቀት ዮሰ፤ ህትን ዋሃ ቄጉ እት ዶርቶተለክ ሀሳ ወክት ጉዕመ እኮሰ ሃሌን በለት ኡለተ ዋቀርቶተ ወልቀት ዮሰ።

7 ምስክርነቱሰ ሹልቶች ኤተሮን አበ ጥዕላሽ በዊች ፋለኖ ቡሳውቹ እሳን ኦለሞ ቄል ሸኖሰ።

8 ሬሽሰ ሎረ ከተም ዋቄ በላን ኡጄኖ፤ ሁኩ ከተሙ ሶዶመ ህከረንገ ግብጸ ዬን ገኤኖ ከተሚሃ ምሳሌተ፤ ሁኩቤቹንኩ እሰ ቀርቹ ሰቀለሞሃቤቹ።

9 ህከኒች ኤተሮን ወገኒች፥ ደቦች፥ ዘሬች፥ አደደ አፎ ጠወኣኖ መኒች፥ ባዲች ጉዕሚች ልግቡ ኡመቱ ሞገምበገ ከንት ሰሱ በርሃ መቶ በሬ ደርተ ሬሽሰ ለኣኣ፤ ሬሽሰ ሞገመኖበእገ ከንታኣ።

10 ሁኩ ለሙንኩ ነብያኑት ኣዲንያ አል መነ ኦርሶቤቹሃ ኣዲንያ አሌን ሄኣኖ መኑ ነብያኑት ሬቶቤቹሃ አበ ሙንደኣኣ፤ ህትን ሙንዲኖ ከበጃት ከበጅት ገገዉንኩሰ ኣሰቱተ ኣሰቀንታኣ።

11:1 ሕዝ. 40፥3፤ ዘካ. 2፥1-2። 11:2 ሉቃ. 21፥24። 11:4 ዘካ. 4፥3፤ 11—14። 11:6 1 ነገ. 17፥1፤ ፋል. 7፥17-19፤ 1 ሳሙ. 4፥8። 11:7 ዳነ. 7፥7-21፤ መና. 13፥5-7፤ 17፥8። 11:8 ኢሳ. 1፥9-10።

11 ጠዉ እኮጎሬ ሰሱ በር ደሬን ህጎች ኤተሮን ሄእ ሩሁ መገኒች አሜች ሬሻን ኣጎ፤ ሎካንከሰ ኡሪቶኡ፤ ለኦ መኑ አበ ዋጅቶኡ።

12 ህከኒች ኤተሮን ለመንኩ ነብያከት አሌ ፋሌ ይታ ሎረ ላገተ ሰሜች ሞጮጮቶኡ፤ ባለጋሩሰ ለአን ጎማን ሰማ ዋልት መርቶኡ።

13 ህከ ወክትንከ ኡለ አሌን አቡ ሌንቄቄ እኮ፤ ከተሚችሰ ቶንቅ አፎሁ ድጀሞ፤ ኡለ ሌንቄቅ መሳን ለመሉ ሺህ መኑ ሬዮ፤ ሬሆች ፈቆእሩ አበ ዋጅቶኡ፤ ሰሜ መገኒሃ ሰገዶኡ።

14 ለንክ «ኣዬ» ዬኖ ኦርሸት ህጎኡ፤ ህትን ሰቅ «ኣዬ» ዬኖ ኦርሸት ደዕልት አሜታኡ።

ለመልቅ ጡሩሞብተኔሃ

15 ለመልቅ መላይኬቹ ጡሩሞበሰ ቡሾ ወክት «ኣዲንያ አል ዋምነቱ ቀርችሃኔ መሲህሃ እኮኡ፤ እሰን ዘማኒሃ ዋመ እክ ጠዕቅቶንትቤቺሃ ገለትጮናንኬ» ይታ ሎርሎረ ላገት ሞጮጬንቶኡ።

16 መገን ብሬን ኬዕሞኝ ቦርጭማን አፋዕልቶ ለሞድሞኔ ሾልንት ባልቀት ሚኔንተሰ ሙግይት መገኒሃ ሰገዶኡ፤

17 «ዮንቲሁ፡ ሄኣንቲሁ፤

ጉዕመንከ አታልታንት ቀርቾ መገኖ!

ሎረ ወልቀክ ገይኪሃ አቶንትቤቺሃለከ

ዋመ እክ ጠዕቅቶንትቤቺሃ ገለትጮናንኬ።

18 አይሁደ እኮበእ መኑ ኡሙዕርቶኡ፤

ጠዉ እኮጎሬ ኪ ኡሙዕርት አሜቶኡ፤

ህትን ሬቶ መን አሌን ፈረዳንት ወክቱ ኢልዮኡ፤

ካዲማተክ ነብያናተለከ

ጠሊላኖተ ሱዕመክ ሎርሰታሀኑኡተ፤

ቀቀዋኖተለከ ሎርሎራኖተ፤

ዋገሰ አታንትሰ ወክቱ ኢልዮኡ

ኣዲንያ አል ቤሶረ ቤሳንት ወክቱ ኢልዮኡ» ይቶኡ።

19 ህከኒች ኤተሮን ሰማን ዮ መገን ሞኑ ፈንተዕያን ወኣድ ሳጥኑ መገን ሞኔን ለሌእ፤ ህትን በለቁ፤ ላገቲ፤ ጉገኛት፤ ኡለ ሌንቄቄለከ አበ በረደሃ እኮ።

11:11 ሕዝ. 37፥10።

11:12 2 ሃገ. 2፥11።

11:13 መና. 6፥12፤ 16፥18።

11:15 ፋል. 15፥18፤ ዳን. 2፥44፤ 7፥14-27።

11:18 መዝ. 2፥5፤ 110፥5፤

115፥13።

11:19 መና. 8፥5፤ 16፥18፤ 21።

12

መንቸለክ ደህችተኔሃ

¹ ህከኒች ኤተሮን አበ አጀብሲሳ መላት ሰማን ለልቶኤ፤ ሁኩንን መት መንቸት አሩ ኦደኦኢት አገንቹ ሎካችሴ ዋሮ አዲን ዮኢት ቶነ ለሞ ቤዜ አክሊለ ቡዕላንከሴ አቶኢት ሂኦ እቅ።

² እሴን ላፈተ እኮቤቺሃ ኒጠኛት አፋንሴ ጨነቀንት ያርታኢት እቅ።

³ ህትን ዋልት መላት ሰማን ለሊቶኤ፤ እሰን ለመሉ ቡዕሉለክ ቶኔ ቡዱ ቡዕላንከሰ ለመሉ አክሊሉ ዮ ሎሩ ቢሹ ደህቹ ለሌእ።

⁴ ደህቹሰ ዱቢንከሰ ቤዜ ሰቅሜሽ ሰሜች ሀጣው ኡላን ኡጁእ፤ እሰን ህት ኒጣ መንቸት እልቶ ወክት ጨልሴ አጉዕም ከሞተ እልቶተ እኮ መንቸ ብሬን ኡሬእ።

⁵ እሴን ኡመት ጉዕመንከ ብረት በርቲን አዘኹ ጠቀኖ ለባ ጨል እልቶኤ፤ እኮጎሬ ቤቱሴ መገን ቤቹ ሁኩንን መገን ኬዕምኝ ቦርጭመ ቤቹ ቀቡል አኤን መሴመሰ።

⁶ ህት መንቸንት መቼ ኩሞተ፤ ለም ጥብተለክ ሌሃዉ በር ክድማተ መገኑ ቅጥ አዕዮሴቤቹ ኡለ ኡድመ ሁንቶኤ።

⁷ ህከኒች ኤተሮን ሰማን በገዙ ኬዕዮ፤ ምካኤሊለክ እሰ መላይከት ደህቹን ኦለንቶኤ፤ ደህቹለክ መላይከት ፈንቀልት ምካኤሊንለክ መላይካን ኦለንቶኤ።

⁸ ጠዉ እኮጎሬ ደህቹለክ እሰ መላይከት ቄለንቶኤ፤ ቄለንቶች ኤተሮን እሰ ሰማን ሄኦበእገ ቤቹ ሆሮ ደገሞሰበእ።

⁹ ህከ ሎረ ደህቹ ዋሮ ዋሼን ቶሬመ፤ እሰን መነ ጉዕመንከ ሉሲሰኖ እልቢሰ ህከረንገ ሼይጣነ ዩን ገኤኖ ወዕኔሃ ዋሮቹ፤ እሱ ኡለተ ዋሼን ቶሬመ፤ እሰ መላይከንተ እሲን ሜጡበ ቶሬመ።

¹⁰ ህከኒች ኤተሮን መት ሎረ ላገት ሰማን «ቴሁ መገኑ ገይሰ ጡምሱሰ፤ ዋልቀሰለክ ዋምነቱሰ ለሊሾኤ፤ እሰ መሲሁ ሹምነቱሰ ለሊሾኤ፤ አመኔኦሱተ መገንኔ ብሬን ሀንከዕርተለክ በራሃ ብተንሰን ሄዕዮ አመኔኦሱ ከሳሹ ቶረሞኤ።

¹¹ እሰ ሆልች ቄጊንለክ ጠወኦ ምሰክር ላጋን እሱ ቄልቶኤ፤ ነብሴሃሰ አሙዙዕነ ገዉሰ ሬሆተ ህግሰ ኦቶኤ።

¹² ህካን እኮቤቺሃ ሰሞለክ ሰሜ ኣዜን ሄኤንነተሩ ጉዕሙንኩ ተሽ ዩንክዕኔ፤ ቀዉ ወክቱ ፈቆሰገ ደገቤቺሃ እልቢሱ ሎረ

12:3 ዳጊ. 7:7። 12:4 ዳጊ. 8:10። 12:5 ኢሳ. 66:7፤ መዝ. 2:9። 12:7 ዳጊ. 10:13; 21፤ 12:1፤ ይሁደ 9። 12:9 ክል. 3:1፤ ሉቃ. 10:18። 12:10 እዩ. 1:9-11፤ ዘካ. 3:1።

ኡሙዕራን ክዕኔቤቹ ድሬቤቹሃ ኡለትለከ ባሩ ቆህኖህዕኔ» ይተን ሞጮጮም።

13 ሁኩ ደህቹ ኡላን ኡጁመሰገ ለዕዮ ወክት ለባ ጩል እልቶ መንቹተ ሽሩ ጀመር።

14 መንቹት ኡለ ኡድማን ቅጥ አኤመሴቤቹ ብር ይት መርቶተ ሎረ ዮብሮ ጎንተ አጉደኖ ለምት ጎንት ኣሰንቶሴ፤ ህከኔን ዋሪች ብሬች ቄዕርት ሰሱ ዘማን ደሬን * ጡመገ አኤን ካደሜን ኣገሬኖሴ እቅ።

15 ህት መንቹት ድርሱ መሰኖሴገ ዋርቹ አበ ዛዘኖ ዊ ጌሰ ዋሃ አፊችሰ ኤተርንከሴ ቱፎ።

16 ጠዉ እኮጎሬ ኡለት መንቹተ ሀዕልት አፎሴ ፈንት ደህቹ አፊችሰ ቱፎሃ አበ ዛዘኖ ዋሃ አጎኡ።

17 ህከኒች ኤተርን ደህቹ መንቹን ኡሙዕር ፈቆ እሴ ዘሬን ኦለሞተ ኦርዕዮ፤ እሰን መገን ትዛዝ አገርታህኡንኣለከ ኢሲሃ አመዕነንት መስከርታእረ።

18 ደህቹንኩ ባር ገበላን ሽፋር አሌን ኡሬአ።

13

ለሞ ቡሳውተኔሃ

1 ህከኒች ኤተርን መቼ ቡሳውቹ ባሪች ፋለን ለዕዮም፤ እሲንከ ቶኑ ቡዱለከ ለመሉ ቡዕሉ ሄዕዮሰ እቅ፤ ቡዳንከሰ ቶኑ አክሊሉ ሄዕዮሰ እቅ፤ ቡዕላንከሰ መገኑ ቦርርታ ቦርር ሱዕሙ ሄዕዮ እቅ።

2 ለዕዮም ቡሳውቹ ሰማገ አጉደኖ እቅ፤ ጠዉ እኮጎሬ ሎከሰ ድበ ዬኖ ቡሳውች ሎከተ አፎሰ ዞቤ አፎ አጉደኖ እቅ፤ ህትን ደህቹ ገይሰ ወልቀተለከ ገይሰ ኬዕምኝ ቦርጭመተ ሎረ ወልቀተ ህከን ቡሳዊቹሃ ኣሴሰ።

3 ቡሳውች ቡዕልች መቼሰ ሬሆታ ኢልሰኖ ጡሎ ሄኡሰ ለዕዮም፤ ጠዉ እኮጎሬ ሁኩ ሬሆተ አበቀአኖሰ ጡሎ ፈይሃን ኣዱንያ አሌን ዮ መኑ ጉዕሙንኩ አጀብሰጭ ቡሳውቹ አዎቹ።

4 ደህቹ ቡሳውቹሃ ዋልቀሰ ኣሴቤቹሃ መኑ ጉዕሙንኩ ደህቹሃ ሰገጅ፤ ህትን «ቡሳውቹ አጉደኖሁ አዬት? ህትን እሲንን ኦለሞተ አታለኖ አዬት» ይተን ቡሳውቹሃ ሰገዶኡ።

5 መገን አሌን ቦንለከ ቦርረኖ ላገተ ጠወአኖ አፎሃ ቡሳውቹሃ ኣሴመሰ፤ ሽይልኔ ለሙ አገነ ገዘአይ ጠቆተ ዋልቀተ ኣሴመሰ።

* 12:14 ዘማን ደሬን፡- የኖህ ግርካን ወክቱ፡ ወክትለከ ወክት ደርተ የኖ፤ ሁኩንን ዳን. 7፡25፤ 12፡7 ከተበሞኡ። 12:14 ዳን. 7፡25፤ 12፡7። 13:1 ዳን. 7፡3፤ መና. 17፡3፤ 7፡12። 13:2 ዳን. 7፡4-6።

6 መገኑ፤ ሱዕመሰለከ ሰማን ሄኣእረ መገኑ እስ ኣዜን ሄኣ መነ ቦርሩ ጀመር።

7 እስን ጠሊላኖን ኦለሞተለከ ድለ ኦዕይ ቄለኖገ ሹምነቱ ኣሰሞሰ፤ ህትን ወገኒን፤ ደቦን፤ ኣደደ ኣፎን ጠወኣእረለከ ኡመት ኣሌን ጉዕማንን ሹምነቱ ኣሰሞሰ።

8 ዱንየ ኣሉ ከለቀሞች ጀመር ሱዕሙስ ጎረጠሞ ሆልች ሄኣ መጻፋን ከተበምባሁ ዱንየ ኣሌን ሄኣኖ መኑ ጉዕሙንኩ ቡሳዊሃ ሰገዳኦ።

9 መጨት ዮሲሁ ዮ ጎሬ ሞጮጮን!

10 «ኣዲሁ ኣግ መሰኖሁ ዮጎር ኣገም ኦርኣኖ፤ ኣዲሁ ሲፊን ሬሆተ መደበሞሁ ሲፊን ሬሆኖ» ህትን ጠሊላኖ ኣታዕሉለከ ኣመዕነቱ ለለኖሁ ህከ ወክትዱት።

11 ሞሉ ቡሳውቹ ኡላች ፋሊን ለዕዮም፤ እሲንከ ሆለ ቡድገ ዮ ለሙ ቡዱ ዮስ፤ ጠወኣኖሁ ደህችጋት እቅ።

12 ወዕኔ ቡሳውቹ ቤቸን እስ ሹምነቲን ኣኣኖ እቅ፤ ዱንየ ኣሉለከ እሴ ኣሌን ሄኣእሩ ጉዕሙንኩ ወዕኔ ቡሳውቹሃ ሰገዳገ ኣዕዮ፤ ሁኩ ቡሳውቹ ወዕና ሬሆተ ኣበቀኣኖ ጡሎ ፈዬስ ወዕኔሃ ቡሳውቹ።

13 ጠወ ኣኮጎሬ ለምቅ ቡሳውቹ መን ብሬን ጊረተ ሰሜች ኡለተ ድርሰኖ ኢለ ሎርሎረ ኣጀብሲሰኖርቹ ኣኣኖ እቅ።

14 ዋዕኔ ቡሳውቹ ብሬን ኣኣተ ኣሰሞስ ኣጀብሲሰኖርቹ መሳን ዱንየ ኣሌን ሄኣ መነ ሉሲሰኖ እቅ፤ ሲፊን ጡላይ ፈዬ ቡሳውቹሃ ኬዕምኣ ሞሰለ መክሶተ ዱንየ ኣሌን ሄኣኖ መኒሃ ለንክ ቡሳውቹ ኣዘኾሰ።

15 ለንክ ቡሳውቹ ወዕኔ ቡሳውቹሃ ሞሰሊሃ ሄኣ ሩህ ኣሶተ ሹምነቱ ኣሰሞሰ፤ ሄኣ ሩህ ኣሶተ ሹምነቱ ኣሰሞሲንኩ ሞሰሉ ጠወኣተ ኣታሎታትለከ እሲሃ ሰገድቡሩ ጉዕሙንኩ ሬታገ ኣኣኖ እቅ።

16 ለንክ ቡሳውቹ ቀቀዋኑተ እኮኡ ሎርሎራኑተ፤ ቀባጣመተ እኮኡ ቡጥቻኑተ፤ ርስቹ እኮ ሰዋልድቹ፤ ጉዕሙንኩ መኬስ ኣንጋን ህከረንገ ሚኔስ ኣሌን መላተ ኣቶተ ግድሾስ።

17 ከን ሃሌን ቡሳውቹ ሱዕመ ለሊሰኖ መላት ህከረንገ ሱዕምስ ዋልንሹ ዮበኢሁ ህኩ መንቹሁ ህዕርተለከ ህርታ ኣታለኖበኦ።

18 ቲሁ ሀይመት ዮኢሁ ከንቤቸንት፤ ቀልቡ ዮሲሁ ቡሳውቹ ዋልንሹ ዋለኡን፤ ሁኩ ዋልንሹ መን ዋልንሹ ለሊሰኖ፤ ዋልንሹሶ ለህ ጥብታ ሌሃይኔ ለሁሃን።

14

ሆልቶለክ መት ጥብተ ሸይልኔ ሾሌ ኩሜ መንተኔሃ

¹ ህከኒች ኤተሮን ሆልቶ ጽዮን ቆተ አሌን ኡሬኢሃ ለዕዮም፤ እሲን ሜጡብ እስ ሱዕሙለክ እንስ ሱዕሙ ሚኔስ አሌን ከተበሞ መት ጥብተ ሸይልኔ ሾሌ ኩሜ መኑ ሄኦ እቅ።

² ሰሜች አበ ፋሞ ዊ ላገገለክ አበ ጉገኛ ላገገ ዮ አበ ላገተ ሞጮጮም፤ ሞጮጮም ላገት ክራረ ዋቀርታ ክራረ ላገተ አጉደኖሃ እቅ።

³ ኬዕምኝ ቦርጭማንለክ ሾሎንከ ክልቀት ባለቀ ብሬን መት ጥብተ ሸይልኔ ሾሌ ኩሜ መኑ ሃዕሮ መዝሙረ ዘመርቶኤ፤ ህከ መዝሙረ ኡለ አሌን ዋዜመስ መት ጥብተ ሸይልኔ ሾሌ ኩሜ መን ቤሉ አዪሁ ደጎተ አታለኖበኦ።

⁴ እሲን እለንቶኢች ዝነተ አት አገኝትበረ እኮቤቹሃ ሜንቲን ዝነተ አኡ ሆግንከስ ንጃሶበኦ፤ ሆልቶ መርቤቹሃ ጉዕመንከ አዋንታኦ፤ እስ መገኒሃለክ ሆልቶሃ * መን በሊች ሀንገፈ እክ ዋዘንቶእራን።

⁵ እስ ክዝብ ጠወኦበኦ፤ ሂሉ ኩሌኖሰርቹንኩ ዮሰበኦ።

መገን ፍርደ ኩልታ ስሶ መላይከተኔሃ

⁶ ህከኒች ኤተሮን ዋሉ መላይኬቹ ኣዲንያ አሌን ሄኦኖ ኡመቲሃ፤ ደቦተ፤ ባዲሃ፤ አደደ አፎ ጠወኦ መኒሃለክ ወገኒሃ ጉዕሚንከ ዱዱብሲሃ ዘላለሚሃ ሄኦ ተሸት ላገተ ኩሎተ ሰሜ በላን ብርዮን ለዕዮም።

⁷ እሲን ሎረ ላጋን «መገኑ ዋጅዬ! ከበጅዬስ! መስንትስ እስ ፈረደኖ ወክቱ ኢሊቤቹሃ ሰማንለክ ኡለተ፤ ባረለክ ዊ ቡቁተ ከለቆ መገኒሃ ሰገጃ!» ዬእ።

⁸ ዋሉ ለምቅ መላይኬቹ «ሰከርሰኖ ዝነሴ ዋይን ጠጀ ኡመቲሃ ጉዕሚንከ አግሶ ህት ሎረት ባብሎንቹት ኡቦኡ! ኡቦኡ!» ዮን ወዕኔስ መላይኬቹ አዋቹስ።

⁹ ዋሉ ሰቅ መላይኬቹ ሎረ ላጋን «ቡሳውቹሃለክ ሞስሊሃ ሰገዳኦ፤ መላስ ሚኔንከስ ህከረንገ አንጋንከስ አታሩ ጉዕሙንኩ

¹⁰ መገን ኡሙዕሬ ወይን ጠጀ አጋኦ፤ ሁኩ ወይን ጠጁ ልቃለቀሙዕናን ኡሙዕሬስ ጠበቲን እንክለሞሃን፤ ህትን ጠሊሊ መላይክ ብሬንለክ ሆልቶ ብሬን ጊራንለክ ዲን ዬኖ ፍሚን ኦርጨቀንታኦ።

^{14:1} ሕዝ. 9፥4፤ መና. 7፥3። * ^{14:4} ሆልቶሃ፡- ዮኖሁ ኢስ ዩሃን። ^{14:5} ሶፎ. 3፥13። ^{14:8} ኢሳ. 21፥9፤ ኤር. 51፥8፤ መና. 18፥2። ^{14:10} ኢሳ. 51፥17፤ ክል. 19፥24፤ ሕዝ. 38፥22።

11 እስተ ኦርጨቀንታገ አታ ገራች ፋልታ ወሊልት ዘላለሚሃ አሌ ሰማ ዋልት ፋልታኝ፤ ህከን ቡሳውቸሃለከ እስ ምስሊሃ ሰገዳእሩ ሱዕምስ መላተ አቶሩ ጉዕሙንኩ ሀንከዕርተለከ በራሃ ፎሎጩ ዮሰበኦ» የን አዎቻሰ።

12 መገን ትዛዝ አገርታሀኑኤንለከ ኢሳን አመዕንት ጠረኝት ሄኣ ጠሊላኖ አታዕሉ ለላኖሁ ከኒንት።

13 ሰሜቹን «ካን ከተብ፤ ከኒች ኤተሮን ቀርቼ አመዕንት ሬታእሩ ማሰክንቶእረ» ይታ ላገተ ሞጮጩሞ፤ ህትን ጠሊሉ አያኑ «ሆጎስ ሆንጌች ፎሎጮቶተ ሆጉስ አዎንታሰቤቸሃ እስ ሀንቅንከ ማሰክንቶእረ» የኖ።

ቀርች ኡሙዕርት ኣዱንያ አሌን

14 ህከኒች ኤተሮን ዋጁተ ጎመተ ለዕዮሞ፤ ጎመሰ አሌን መንች ቤቱ አጉደኖሁ አፋዕልዮኡ፤ ቡዕላንከስ ወርቅ አክሊለ አዕዮኡ፤ አንጋንከስ እጳሽተ ዘዘረተ አፎኡ።

15 ዎሉ መላይኬቹ መገን ምኒች አሜች ጎመ አሌን አፋዕሌኢሃ ሎረ ላጋን «ኡለ አሌን አዘመረ ጭም አኤኖለከ ሞዴኖ ወክቱ ሆንጠኮኡ!» ዩኡ።

16 ጎመ አሌን አፋዕሌኢሁ ዘዘረሰ ኡለተ ሶካን ኡለንት ሞደንቶኡ።

17 ዎሉ መላይኬቹ ሰማን ዮ መገን ምኒች ፋሎ፤ እስን እጳሽት ዘዘረት አፎ እቅ።

18 ገረ አሌን ዎልቀት ዮሲሁ ዎሉ መላይኬቹ ክትመ ክትሜኖ ጠረጴዝ መዲች ፋል ኢጳሽተ ዘዘረተ አፎ መላይኬቹ «ወይኑ ላሎቤቸሃ እጳሽተ ዘዘረክ ሶክ ወይን ላልቹ ጉዕመንከ ኡለ አሊች ሞድ ጭም አእ!» ይ ሎረ ላጋን ያሮ።

19 መላይኬቹንኩ ዘዘረሰ ኡለ አል ሶክ ኡለ አሌን ዮ ወይን ላልቹ ሞጅ ዎይን ጩንሼኖ ሎረ ቤቸን ዋሮ፤ ሁኩንን መገን ኡሙዕርያቤቹ።

20 ከተሟች አብሌን ዮ ወይን ጩንሼኖቤቸን ጩንሸሞ፤ ጩንሼኖቤቸች ፋርሶ ብጣለ ኢላኖ ጌስ አሌ ዋል ሰሴ ጥቤ ኪሎ ሜትረ † ኢለ ኢላኖ ቄጉ ፋል ዱንተዕዮ።

14:11 ኢሳ. 34፡10። 14:14 ዳን. 7፡13። 14:15 እጸ. 3፡13። † 14:20 ሰሴ ጥቤ ኪሎ ሜትረ፡- የኖሁ መቼ መንቹ ሌሁ በር ሃመኖ ዋቄ ጌስ አሀኖሃን። 14:20 ኢሳ. 63፡3፤ ሻዞ. 1፡15፤ መና. 19፡15።

15

መጨረሻ በለተ አፎ መላይከተ

1 ዋሉ አጀብሲሰኖ መላተ ሰማን ለዕዮም፤ ሁኩንን መገን ኡሙዕርት ጎፋ መጨረሻ ለመለ በለተ አፎ ለመለ መላይከተ ለዕዮም፡፡

2 ህከኒች ኤተሮን ጊራን ልቀለቀሞ ለአቃንች ባረ አጉደኖሃ ለዕዮም፤ ህትን ቡሳውችለከ ቡሳውች ምሰለ፤ ሱዕምሰ ዋለንሽ መላተ ድለ አቶረ ለዕዮም፤ መገኑ አሴስ ክራረ አፍ ህከን ቡርጨቅ ባር መዴን ኡርቶኢሃ ለዕዮም፡፡

3 እሰን መገን ካድንች ሙሰ መዝሙረለከ ሆልች መዝሙረ «ጉዕመንከ አታልታንት ቀርች መገኖ!

ሆጉክ ሎረተለከ አጀብሲሳኦታን፤

ጉዕማንከ ኡመት ዋመ!*

ዋቆክ ጌጥዬሃለከ ሀንቅሃን፡፡

4 ቀርች! ኬሳሃ ዋጅባሁለከ

ሱዕመክ ከበጅባሁ አዬት?

መሰንትሰ ጠሊሉ ጠለዕል አቴት፤

ሀንቅ ፍርዱክ ለሌቤቺሃ

ኡመቱ ጉዕሙንኩ አሜች ብሬንከክ ሰገዳኦ» ይተን ዘመርታ እቅ፡፡

5 ህከኒች ኤተሮን ምሰክር ዱካኑ ሁኩንን መገን ምኑ ሰማን ፈንተዕያን ለዕዮም፡፡

6 ህከ ለመለንከ በለተ አፎ ለመሉንኩ መላይከተ መገን ምኒች ፋልቶኡ፤ ነጠተ በለቃ ዋጂተ ኦድኑተ ኦድኑ እቅ፤ ወዘነሰ ዋርቅ ቀበቶን ቆዕርቶ እቅ፡፡

7 ሾሎንከ ክልቀቲች መቱ ለመለንከ መላይከቺሃ ዘላለሚች ዘላለመ ኢላ ሄኦኖ መገን ኡሙዕርት ዊንቶ ለመለ ዋርቅ ጠበትተ አሴስ፡፡

8 መገን ኬዕምኒችለከ ዋልቃች ፋልታ ወሊልት ዱኦ ምኒ ዊሞ፤ ሁኩ ለመሉንኩ መላይከተ አፎ ለመሉንኩ በለት እሆተ ኢላ አዪሁ ዱኦ ምኒ አጎተ አታሎበኦ፡፡

* 15:3 ኡመት ዋሙ- መት-መቱ እንክለንቶሩ «ዘማናከ ዋመ» ይታኦ፡፡ 15:3 ፋል. 15:1፡፡ 15:4 ኤር. 10፡7፤ መዝ. 86፡9፡፡ 15:5 ፋል. 38፡21፡፡ 15:8 ፋል. 40፡34፤ 1 ንገ. 8፡10-11፤ 2 ዱዱ. 5፡13-14፤ ኢሳ. 6፡4፡፡

16

መገን ኡሙዕሬተኔሃ

1 ህከኒች ኤተሮን ለመለንከ መላይከተ «መሬ! መገን ኡሙዕርተ ዊንቶ ለመለንከ ጠበቲሃ ኡለ አሌን ዱኛ» ይታ ሎረት ላገተ መገን ምኒች ፋልተን ሞጮጮም።

2 ዎዕኔሰ መላይኬቹ መር ጠበቲሃ ኡለ አሌን ዱኛ፤ ቡሳውች መላት ዮሰሀኑኤንለከ ቡሳውች ምሰሊሃ ሰገዳ መን አሌን ሂሉለከ አበ ጥዥ ጨነቀኖ ጡሎ ፋሎ።

3 ለንክ መላይኬቹ ጠበቲሃ ባር አሌን ዱኛ፤ ህከ ወክት ባሩንኩ ሬዮ መን ቁግገ እኮ፤ ህትን ባር ኣዜን ሄእኖ ፎሉ ዮሰርቹ ጉዕመንኩ ሬዮ።

4 ሰቅ መላይኬቹ ጠበቲሃ ዛዘኖ ዋንለከ ዊ ቡቆን ዱኛን እሰን ቄጉ እኮኡ።

5 ዊ አሌን ዎልቀት ዮሰ መላይኬቹ «ዮንቲሁለከ ሄኦንት ጠሊሉ! ህት ፈረዶንትቤቺሃ አት ፈየሃን።

6 መኑ ጠሊላኖለከ ነብያከ ቄጉ ዱንቶቤቺሃ እሳሃ ቄጉ አግሶንትሰ፤ ሁኩንን እሳሃ ሀሰሰኖሰ» ዮን ሞጮጮም።

7 ህትን ህጣነ ሀጪሴኖ ጠረጴዙ «ኤ! ጉዕመንከ አታልታንት ቀርቻ መገኖ! ፍርዱክ ሀንቅሃለከ ፈየሃን» ይታ ላገተ ሞጮጮም።

8 ህከኒች ኤተሮን ሾልቅ መላይኬቹ ጠበቲሃ አር አሌን ዱኛ፤ አሪቹንት መን ፋራንተሴ ቡሰቶተ ዎልቀት ኣሰንቶሴ።

9 መኑንኩ አበ ፋራን ቡሶኡ፤ ህከን በለ አሌን ሹምነቱ ዮሰ መገን ሱዕመ ቦርርቶኡ፤ ህትን ቶበቶበኣ፤ እሱንከ ከበጅቶሰበኣ።

10 ኣንትቅ መላይኬቹ ጠበቲሃ ቡሳውች ኬዕምኝ ቦርጭም አሌን ዱኛ፤ ቡሳውች ዎምነቱንኩ ቱንሰቹ እኮ፤ መኑንኩ አበ ኦርጨቀንቶቤቺሃ እንኩሰ ኢጦኡ።

11 እሰን አበ ኦርጨቀንቶቤቺሃለከ ጡላይቶቤቺሃ ሰሜ መገኑ ቦርርቶ ቤሉ ሂለ ሆጎችሰ ቶበት ፈንቀልቶበኣ።

12 ሌህቅ መላይኬቹ ጠበቲሃ ኤፍራጤስ ዬኖ ሎረ ዛዘኖ ዋን ዱኛ፤ ዉሁ ሸርቂቅ አሜታ ዎማተ ወቃሃ መክሲሃ ዛዘኖ ውሁ ሞሎ።

13 ህትን ደህች አፌችለከ ቡሳውች አፌች፡ ክዝበኛ ነብዬች አፌች ጎቼዕኜተ አጉዳ ሰሱ ሂሉ አያኑ ፋሊን ለዕዮም።

14 እሰን ሩሃንይ አያን እኮቤቺሃ አጀብሲሰኖ ጠወ አተን ጉዕመንከ አታለኖ መገን ሎረ በሬን እሀኖ በገዚሃ ጭምአቶተ ጉዕማንከ ባድ ዎመቤቹ መርታኣ።

15 «እን ሞጋንችገ ድንገቱ አሜታም፤ ህካን እኮቤቹሃ ከል እካን መኑ ሻይደስ ለዕበገ ኬዕይ ኦድኑስ አገዕረኖ መንቹ ማስአሞእሃን።»

16 ሁኩ አያነንት ዋመተ እብራዊ መን አፎን አርማጌዶነ ዬናቤቸን ጭሞአቶኡ።

17 ህከኒች ኤተሮን ለመልቅ መላይኬቹ ጠበቱሃ ቦብር አሌን ዱቹ፤ ህከ ወክት ዱእ ሞኒ አዜን ዮ ዳኝነት ቦርጭማች «አበቀዕዮ» ይታ ሎረ ላገት ፋልቶኡ።

18 ህትን በለቁ፤ ላገት፤ ጉገኛትለከ ኡለ ሌንቁቁሁ እኮ፤ ህትኔ ሎሩ ኡለ ሌንቁቁ መኑ አዱንያ አሌን ከለቀሞሀኒች ኬሽ ሆሮ እክ አገኘኖበኢ።

19 ህትን ሎረ ከተንቹት ሰሱ ቤቹ እክ ቤሀንቶኡ፤ ህትን ኡመት ከተመንት ድጀንቶኡ፤ መገኑ ሎረ ባብሎን ቃጎ፤ ሎሩ አሙዕሬስ ዋይን ጠጂ ዊሞ ጠበትተ አጋገ አዕዮሴ።

20 ህትን ዊን ረበንቶ ኡለት ጉዕመንት በኦኡ፤ ቆተንት ደገንቶበኢ።

21 ህትን መት-መቱስ ሸይልኔ ኦንቴ ኪሎ ጌስ እሀኖ በረዱ ሰሜች መን አሌን ኡቦ፤ በለስ አበ ጨነቃቤቹሃ መኑ በረድ በለ መሳን መገኑ ቦርርቶኡ።

17

ዝነተ አታ መንቸተኔሃ

1 ህከኒች ኤተሮን ለመልንተ ጠበትተ አፎ ለመለ መላይካች መቱስ ኢቤቹ አሜች «ከበ አሞ! ልግቤ ዊ አሌን አፋዕልቶ ሎረ ዝነተ አታ መንቹ አሌን ኢለኖ ፍርደ ለላሳንኬ።

2 አዱንያ አል ዋመት ዝነተ አቶኢሁ እሴኒት፤ ህትን አዱንያ አሌን ሄአእሩ ዝነተ አእሴ ዋይን ጠጂን ሰከርቶኡ» ይ ኩሎኤ።

3 ህከኒች ኤተሮን መላይኬቹ አያኒን ኡለ ኡድመ መሴኤ፤ ዊሙ ጅሰማንከስ ቦርር ሱዕሙ ዊሞ ቢሽ ቡሳውች አሌን ቆጶ መት መንቹተ ለዕዮም፤ እሲንከ ለመሉ ቡዕሉለከ ቶኑ ቡዱ ዮሰዩ እቅ።

16:15 ማቶ. 24፥43-44፤ ሉቃ. 12፥30-40፤ መና. 3፥3። 16:16 2 ነገ. 23፥29፤ ዘካ. 12፥11። 16:18 መና. 8፥5፤ 11፥13፤ 19። 16:19 ኢሳ. 51፥17።

16:20 መና. 6፥14። 16:21 ፋል. 9፥23፤ መና. 11፥19። 17:1 ኤር. 51፥13።

17:2 ኢሳ. 23፥17፤ ኤር. 51፥7። 17:3 መና. 13፥1።

4 ህት መንቹት ሰመ አጉደኖ ብሽ ኦድኑተ ኦደኦ እቅ፤ ወርቁን፤ ጤአተ እኮ ክኒንለከ ዕንቁኤን መክጨንቶ እቅ፤ አንጋንከሴ ኮፍ ይታ ዝነተ አታ ንጃሱ ዊሞሰ ዋርቅ ጠበቲሃ አንጋንከሴ አፎ እቅ፡፡

5 ሚኔሴ አሌን ሞሰጥር የኖ ሱዕሙ «ዝነተ አታህኑሉለከ ኡለተ ንጃሰሳህኑኤ አመተ ሎረተ ባብሎንቹተ» የመሞ ከተበሞኡ፡፡

6 ህት መንቹት ጠሊላኖ ቄጊንለከ ኢሰተኔሃ ይት ሬቶ መን ቄጊን ሰከርታን ለዕዮም ወክት አበ አጀብሲጮም፡፡

7 ጠዉ እኮጎሬ መላይኬቹ «ሚሃት አጀብሲጮታንቲሁ? መንቹ ሞሰጢርለከ እሴ ቆጶ ለመሉ ቡዕሉለከ ቶኑ ቡዱ ዮሰ ቡሳውቶ ሞሰጥር ለሊሳንኬ፡፡

8 ሁኩ አት ለኦንት ቡሳውቹ ከኒች ብርተ ሄዕዮ እቅ፤ ቴሱ ዮበእ፤ ኤተሮን ጥዕላሽ በው ኣዚች ፋለኖ፤ በእቤቹ መረኖ፤ ኣዱንያ አል ክልቀቲች ጀመር ሱዕሙሰ ሄእ መጻፋን ከተበንትባሁ ኣዱንያ አሌን ሄእኖ መኑ ቡሳውቹሰ ከኒች ብርተ ሄዕዮሁ፤ ቴሱንገ ዮበኢሃለከ ኤተሮን አሜተኖሃ አሁሰ ለኦ ወክት አበ አጀብሲጮቶኡ፡፡

9 «ሀይመት ዮ ቡዕላ ሀሴኖሁ ከንቤቾኒት፤ ለመሉንኩ ቡዕሉለከ መንቹት አፋዕልቶ ለመሌንተ ቆተ፤ እሰን ለመሌንተ ዋመ፡፡

10 እሳቾን ኦንቱሰ ኡቦኡ፤ መቱሰ ቴሱ ዮኡ፤ ህትን ዋሉሰ ቴሱ ኢላ አሜቾበእ፤ እሰ አሜተኖ ወክት ቀዉ ጌሰ ዱንኩ ሀሰሰኖሰ፡፡

11 ሁኩ ከኒች ብርተ ዮኢሁለከ ቴሱ ዮበእ ቡሳውቹ ህዜትቅዮ ዋመ፤ እሰ ህከን ለመሊችን መቶሃሰ፤ እሰን በእቤቹ መረኖ፡፡

12 «ሁኩ ለዕዮንሰ ቶኑንኩ ቡዱ ዋመ እኩዕነ ዮኢሩ ቶኔተ ዋመ፤ ጠዉ እኮጎሬ ቡሳውቹንን ሜጡበ መቶ ወክቲሃ ዋመ እኮተ ዋልቀት ኣሰንታሰ፡፡

13 ሁኩ ቶኖንኩ ዋመት መቱ ሰውቱ ዮሰራን፤ እሰን ዋልቀሰለከ ሹሞንቱሰ ህከን ቡሳውቹሃ ኣታኦ፡፡

14 እሰን ሆልቶ አሌን በገዙ ኬሳኦ፤ ጠዉ እኮጎሬ ሆልቶ ቀርቻኖ ቀርቹለከ ዋመ ዋመ እኮቤቹሃ ቄለኖሰ፤ ህትን እሰን ሜጡበ ዮኢሩ ገኢንቶኦረ፤ መጠረንቶኦረለከ አመዕነንቶኦረ» ዬኤ፡፡

15 ህትን መላይኬቹ «ህት ዝነተ አታኢት አፋዕልታን ለኦንት ልግቡ ዉሁ፤ ኡመቱ፤ መኑ፤ ወገኑለከ አደደ አፎሃ ጠወኣኦረ፡፡

16 ቡሳውቹለከ ለኦንት ቶኑ ቡደት ዝነተ አታኢት አልሴ ግባኦ፤ በኣገ አታሴ፤ ከል አት ፌሳሴ፤ ማለሴ እት ጊራን ቡሰታሴ፡፡

17 ሃሽኣቱስ ሹልቶተ ከ ሰውት ቀልቤስ አዕዮሁ መገኘሃን፤ ህካን እኮቤቺሃ መገን ላገት እሆተ ኢላ እስ መቶ ሰውትን ኣገቀንታበእ፤ ዋምነት ሹምነቱስ ቡሳውቺሃ ኣታኦ።

18 «ህት ለኦንት መንቺት ኡለ ኣል ዳኛኖ ኣሌን ዋመ እኮአተ ሎረተ ከተንቺ» ዩኤ።

18

ባብሎን ከተም ኡብተኔሃ

1 ህከኒች ኤተሮን ሎሩ ሹምነቱ ዮስ መላይኬቹ ሰሜች ድረን ለዕዮም፤ ህከን መላይከ ኬዕምኚች ኬዕዮህኒን ኡለት አበ ኑር እክ ለልቶኡ።

2 ሎረ ላጋን «ሎረት ባብሎንቺት ኡቦኡ! ኡቦኡ! እሴን ሩሃንዩ ሄእኖ ቤቹ እኮኡ፤ ሂሉ ኣያኑ ጉዕሙንኩ ገለኖቤቹ እኮኡ፤ ኮፍይታለክ ግቤመስ ጨኡትለክ ግዙ ጉዕሙንኩ ገለኖቤቹ እኮኡ።

3 መሰንትሰ ዝነተ አእሴ ዋይን ጠጀ ኡመቲሃ ጉዕሚንከ አግሶኡ፤ ህትን ኣዱንያ አል ዋመት እሴን ሜጡበ ዝነተ አቶኡ፤ ህትን ኣዱንያ አል ነጋድት እሴ ልግቤ ናጠቀንሺን ኬዕዮህኒን ቀባጣመተ እኮኡ» ይዖሮ።

4 ዋልት ላገንት ሰሜች
«ኢ ኡመቲ! እሴ ጨቢን በርገንቶኖቹ፤
እሴ አሌን አሜታ በላተ ቤቀማኑተ እኬንበገ፤
እሴ ኣዚች ፋሌ!

5 ጨብሴ በትኝት ሰማሃ ኢልቶቤቺሃ
መገኑ ብድልሴ ቃጎኡ።

6 እሴ ኣሰቶ ጌሰ ኣሰዬሴ፤
አቶ ሆጎተሴ ለሙ አፎ በርግቲን ባቺሴ፤
እሴ አደደ አጌኖሃ ልቀለቆ ጠበቲን
ለሙ አፎ ጠረኝ አቲን ልቀለቄ።

7 እሴ ገይሴ ኬዕምኝለክ ናጀተ ኣሰቶ ጌሰ
ኦርሽተለክ ሻዘነተ ኣሰዬሴ፤
እሴን ቀልቤንከሴ
ኣን ዋመተ እክ አፋዕልዮም፤
ህዬሽተበእ፤

18:2 ኢሳ. 13:21፤ 21:9፤ ኤር. 50:39፤ 51:8፤ መና. 14:8። 18:3 ኢሳ. 23:17፤ ኤር. 51:7። 18:4 ኢሳ. 48:20፤ ኤር. 50:8፤ 51:6፤ 45። 18:5 ክል. 18:20-21፤ ኤር. 51:9። 18:6 መዝ. 137:8፤ ኤር. 50:29።

ሻዘነት ሆሮ ኢልታኤበኦ ይተን ቦንታኢት።

8 ህካን እኮቤቺሃ በለት ጉዕሙንኩ መቶ በሬን ኢልታሴ፤

ሬሁት፥ ሻዘነትለከ ጎሩ ኢለኖሴ፤

ጌራን ቡባኦ፤

እሴ አሌን ፈረደኖሁ

ቀርቼ መገኑ ጠረኘሃን» የን ሞጮጮም።

9 እሴን ሜጡበ ዝነተ አቶእሩለከ ናጃን ሄኦ ኡለ ዋመት እሴ ቡባን ፋልታ ወሊልተ ለኣ ወክት እሴተኔሃ ያርተን ኦኣኦ።

10 እሰን ኦርሽሴ ዋጅት ቁዕራሻን ኡርት «አት ሎረ ከተንቸ! እት ጠረኘ ከተንቸ ባብሎ! ፍርዱክ መቶ ሳኣት ጌሳን አሜቸቤቺሃ ኬሳሃ ቆሀኖሄ! ቆሀኖሄ!» ይታኦ።

11 ሆጎቡሰ ከኒች ኤተሮን ህዕረኖሁ የበእቤቺሃ ኡለ አል ነጋድንት እሴተኔሃ ኦኣሴ፤ ሻዛሴ።

12 መርከባንከሰ ሆጎበሞ ዋርቀ፥ ብረ፥ ኬዕምኙ የሰ ክኦ፥ ዕንቁ፥ ጡመ ኦድኑተ፥ ሰሜ ደኑለከ ብሽ ሊቀለቀሞ ኦድኑተ፥ ሃር ኦድኑተ፥ ብሽተ ኦድኑተለከ ጡሙ ፎገሉ የሰ ሀቀ ጉዕመንከ፥ ዘኔ እንኩተ፥ አበ ጤአተ እኮ ሀቀሃ፥ ነሐሰ፥ ብረቲንለከ እብነ በረድ ክኒን መክሴመ ኦዳታ ጉዕመንከ።

13 ቀረፋተ፥ አንጀነተ፥ ከርብተ ዬኖ ጡሙገ አንጀኖርቼ፥ ህጣነ፥ ወይን ጠጅ፥ ወርች ዘይተ፥ ሰልቀሞ ቀመ፥ አለሱ፥ ለሉ፥ ሆለተ፥ ፋርሱተ፥ ኬዕምኝ ጋርተ፥ ሮስተለከ ዋሎሃ መነ እቅ።

14 እሰን «አት ሄዕላቶንት ጡሙርቼ ጉዕመንኩ ኪች ቁዕር መሮኡ፤ ቀባጡክለከ ሹልሙክ ጉዕመንኩ በዕዮኡ፤ ከኒች ኤተሮን ህከረ ጉዕመንከ ሆሮ ደጋንትሰበኦ» ይታሴ።

15 ህካን ጉዕመንከ ህዕርተን ቀባጣመተ እኮ ነጋድት ኦርሽሴ ዋጅት ቁዕራሻን ኡርታኦ፤ ኦኣንለከ ሻዘን

16 «ጡመ ኦድኑተለከ ሰመ አጉደኖ ብሽ ኦድኑተ ኦደኣእት፥ ዋርቂንለከ ጤአተ እኮ ኪን ዕንቁንን በለቃ እቅት ሎረ ከተንቸተ ኣዬ! ኣዬ!

17 ኬንኩ ቀባጡት መቶ ሳኣት ጌሳን በዕዮ» ይታኦ።

መርከብ ሀላፌቹ ጉዕመንኩ፥ መርከቢን ሃንታ መኑ ጉዕመንኩ፥ መርከብ አሌን አታ መኑ ጉዕመንኩለከ ባር አሌን ነገዳ መኑ ጉዕመንኩ ቁዕራሻን ኡርታኦ፤

18 እሴ ቡብን ፋልታ ወሊልተ ለኦ ወክት «ተ ሎረ ከተንቹተ አጉደኖ ዋሉ ከተሙ ሄዕዮንዶ?» ይተን ያርቶኡ።

19 ህትን ቡዕልሰ አሌን ትብ አቶኡ፤ ኦአንለከ ሻዘን «ባር አሌን መርከቡ ዮሰሩ ጉዕሙንኩ እሴ ቀባጦን ቀባጣመተ እኮእሩ ህት ሎረ ከተንቹት መቶ ሳኣት ጌሳን በኦቤቺሃ ኣዬ! ኣዬ!» ይተን ያርታኡ።

20 ሰሞሁ! እሴን ተሽ ዩንክ፤ መገኑ ክዕኔተኔሃ እሴ አሌን ፈረጃቤቺሃ አዕኑ ጠሊላኑት፤ አሳበትለከ ነብያኑት ተሽ ዩንክዕኔ!

21 ከኒች ኤተሮን መቱ ጠረኙ መላይኬቹ ሎረ ርትሞ ክን ጌሰ መቱ ክኑ ኬሽ «ሎረት ባብሎን ከተንቹት ህት ዋልቃን ሀንበለንት ኡባእ፤ እሴን ከኒች ኤተሮን ሆሮ ደገንታበኡ።

22 ክራረ ዋቀርታህኡለከ ሙዚቀኛኖ ላገቲ፤ ሁሉሌተ ቡሳህኡለከ ጡሩምበ ቡሳ ላገት ከኒች ኤተሮን ኪን ሞጮጨመኖበኣ፤ እኮሰርቹ መክሰኖ ሀይመት ዮሰ መንቹ ከኒች ኤተሮን ኪን ደገመኖበኣ፤ ህትን ርትሞ ላገቲ ከኒች ኤተሮን ኪቤቸን ሞጮጨንታበኡ።

23 ኩራዙክ ከኒች ኤተሮን ኪቤቸን ለሊሰኖበኣ፤ እዜቸለከ እዜቹ ላገት ከኒች ኤተሮን ኪን ሞጮጨመኖበኣ፤ ነጋድክ ኣዱንያ አል ሎርሎራኑ መኑ ሄኦኡ፤ ሲርንከክ ኡመት ጉዕመንከ ሉሲሶንት» ዮን ባር አሌን ቶሬእ።

24 «ህትን ራጋኑት፤ ነብያኑት ኣዱንያ አሌን ሼመ መን ቄጉ ጉዕመንከ እሴ ኣዜን ደገሞኡ።» ዬእ።

19

1 ህከኒች ኤተሮን ሰማን ልግቤ መን ላገተ አጉደኖ ሎረ ላገተ «መገኒሃ ገለቱ እሁሰ! ፌሱሁ፤ ኬዕምኙለከ ዋልቀት መገንሃን።

2 መሰንትሰ ፍርዱሰ ሀንቀሃለከ ጌጥዬሃን፤ ኣዱንያ አል ዝነተ አኢንከሴ ንጃሲሶ ሎረተ ዝነተ አታኢተ ፈረጃሴ፤ ህትን ካዲማሴ ቄግ ገዱተ እሴቶ ፋሎኡ» ይተን ሞጮጮም።

3 ቲሁ «መገኒሃ ገለቱ እሁሰ! እሴቶ ኬኣ ወሊልት ዘላለሚሃ ሰማ ዋልት ፋልታኡ» ይተን ያርቶኡ።

18:18 ሕዝ. 27:32። 18:19 ሕዝ. 27:30-34። 18:20 ዘዱ. 32:43፤ ኤር. 51:48። 18:21 ኤር. 51:63-64፤ ሕዝ. 26:21። 18:22 ሕዝ. 26:13፤ ኢሳ. 24:8። 18:23 ኤር. 7:34፤ 25:10። 18:24 ኤር. 51:49። 19:2 ዘዱ. 32:43፤ 2 ነገ. 9:7። 19:3 ኢሳ. 34:10።

4 ህትን ለሞይዲሞኔ ሾሉንኩ ባልቀትለክ ሾሉንኩ ክልቀቱ ጄነት ቦርጭመ አሌን አፋዕሌ መገኒሃ ኡብ «አሚዕን! መገኒሃ ገለቱ እሁስ» ይተን ሰገዶኡ።

ሆልቶ ሶሎች ድግሰ

5 ህከኒቶ ኤተሮን «እሱ ዋጅቴነንተ ካዲመት ጉዕሙንኩ ቀቀዋኑንት ሎርሎራኑንት መገኑኔ ገለትጭዬ!» ይታ ላገት ኬዕምኝ ቦርጭማቶ ፋሎ።

6 ህከኒቶ ኤተሮን ልግብየ መን ላገት፥ ዛዘኖ ዊ ላገት፥ ጠረኝ ጉገኛ ላገገ ዮ ላገት «መገኒሃ ገለቱ እሁስ! ጉዕሙንክ አታለኖ ቀርቼ መገኑኔ ዋመ እኮኡ!

7 ሆልቶ ሶሎቹ አሌቤቹሃለክ እዜቹንት ገይሴ ቅጥ አቶቤቹሃ ሙንደዕኑን! ሙንዲኖን እሱንክ ከበጅኖ።

8 እሴንክ በለቀኖ ነጠ ኦድኑተ ኦደኑተ አሴመሴ፤ ህት ኦድኑት ጠሊላኖ ፈይመተ ሆጉ» የን ሞጮጮም።

9 ህከኒቶ ኤተሮን መላይኬቹ «ህከ ሆልቶ ሶሎች ድግሲሃ ገእንቶሩ ማሰእንቶእረ» ይት ከተብ ዩኤ፤ ቲሁ «ኩሩ መገን ሀንቅተ ላገ» ዩእ።

10 እን መላይኬቹሃ ሰገዶተ ሚኔንተኤ ሎካቶሰ ዋሮን ጎምብሰሞም፤ ጠዉ እኮጎሬ እሰ «አጉር! ካን አቶት፤ እን ኪንለክ ኢሰ መሰከሮ ጠወ አፎ ኪ አመኦሶን ሜጡብ ካድንቹሃን፤ እት መገኒሃ ሰገድ፤ መሰንትሰ ሀንቅ ራጉ ጉዕሙንኩ ኢሰተኔሃ መሰከርታእ» ዩኤ።

ኮምቦ ፋሾን ቆጶ ፋሻንቶተኔሃ

11 ህከኒቶ ኤተሮን ሰሞሁ ፈንተዕያን ኮምቡ ፋሹ ለዕዮም፤ ፋሽ አሌን ቆጶንኩ አመዕነሞሃለክ ሀንቂሃ ዩኖሃን፤ እሰን ሀንቂን ፈረደኖ፤ ኦለመኖሁ።

12 እልሰ ጊረ ለበነተ አጉዳኢ፤ ቡዕልሰ አሌኒን ልግቡ እክሊሉ ዮኡ፤ እሰ ቤሉ አዩሁ ደጎተ አታለኖበኢሁ እሰ አሌን ከተበሞ ሱዕሙ ሄዕዮ እቅ።

13 እሰ ቂጊን ጩፊመ ኦድኑተ ኦደዕዮ እቅ፤ ሱዕሙንኩሰ «መገን ላገተ» ዩኖሃን።

14 ህትን ዋጁ ነጠ እኮ ኦድኑተ ኦደኑ ኮምቦ ፋርሶን ቆጶ ሰሜ ጎጎቱ አዋንታሲት እቅ።

15 ኡመቲንከ ዋቀሬኖ ኢጳጹ ሲፋ አፌችሰ ፋላኖት እቅ፤ ህትን ብረት በርቲን ጠቀኖሰ፤ እሰን ጉዕመንከ አታላኖ መገን ዋጅሲሰኖ ኡሙዕርሰ ለሊሰኖ ዋይን ጠጆ ጨንጮኖቤችን ዋይን ጨንሸኖ።

16 ኦድኖሰለከ ጋልሰ አሌን «ዋማኖ ዋመ፤ ቀርቻኖ ቀርቼ» የኖ ሱዕሙ ከተበሞኡ።

17 ህከኒች ኤተሮን አሪ አሌን ኡርዮኢሃ መቼ መላይኬቼ ለዕዮም፤ እሰን ሰሜ አሌን ብርይታ ጨኦተ «ሎሩ መገኑ ቅጥአዕዮህዕኔ ድግሲሃ አሜ! ጭምይዬ!

18 ዋመ ማለ፤ በገዝ ሀለቀ ማለ፤ ጠረኘ መን ማለ፤ ፋርሶ ማለ፤ ፋርሱተለከ ፋርሱተ ቆጶ መን ማለ፤ ቀርቻኖለከ ሮስ ማለ፤ ቀቀዋኖለከ ሎርሎራኖ ማለ አሜ እቼ» ህት የን ሎረ ላጋን ያሮ።

19 ህትን ቡሳውቼለከ ኡለ አል ዋመት ዋታደሩንኩሰ ኮምቦ ፋሽ አሌን ቆጶሀንለከ ጎጎቲንከሰ ሜጡብ ኦለንቶተ ጭምይታን ለዕዮም።

20 ጠዉ እኮጎሬ ቡሳውቼ አፈሞ፤ ህትን እሲን ሜጡብ ብሬንከሰ ልግብ አጀብሲሰኖ ጠዉ አኣን ሄዕዮ ክዝብ ራጋንቹ አፈሞ፤ እሰን ቡሳውቹ መላት ዮሰረለከ ቡሳውቹ ምሰሊሃ ሰገዳእረ አጀብቱተ አኣን ሉሲሰኖሰ እቅ፤ ኩሩ ለሙንኩ ፎሊን ሄኦገን ዲን ዬኖ ቡበኖ ጊረ ባር ኣዜን ኡጄመሰ።

21 ፈቆእሩሁ ኮምቦ ፋሽ አሌን ቆጶሀን አፌች ፋልታ ሲፊን ሬታን ጨኦት ጉዕሙንኩ ማለሰ እት ዱቦኡ።

20

ኩሜ ዘማን ዋምተኔሃ

1 ህከኒች ኤተሮን አበ ጥዕላሽ በወ ፈኔኖ ቁልፈለከ ሎረ ሰንሰለተ አንጋንከሰ አፎ መላይኬቹ ሰሜች ድረን ለዕዮም።

2 እሰን ደህቹ እፍ ኩሜ ዘማን ኡሱሮ፤ ሁኩ ደህቹ እልቢሱ ህከረንገ ሻይጣኑ ወዕኔሃ ዋሪቹ እቅ።

3 ኩሜ ዘማኑ ጎፎተ ኢለ ኡመት ሉሲሰኖበአገ መላይኬቹ ደህቹሰ ሎረ ጥዕላሽ በዋን ቶር አሌሰ ጡፍ ማተበ አዕይ አሸጎ፤ ሁኩ ኩሜ ዘማኑ ጎፎች ኤተሮን ቀዋ ወክቲሃ ሂረሙ ሀሰሰኖሰ።

4 ህከኒች ኤተሮን ኬዕምኣ ቦርጭመተ ለዕዮም፤ ህከን ኬዕምኣ ቦርጭመ አሌን ፈረደተ ሹምነቱ ኣሰሞሰሩ አፋዕልቶኢሃ ለዕዮም፤ ኢሰተኔሃ መሰከርቶቤቺሃለከ መገን ላገተኔሃ ቡዕሉሰ ሙርተዕዮ

መን ነብሳሃ ለዕዮም፤ እሱን ህክን ቡሳዊሃለክ ምስሊሃ ሰገድበረ፤ መላሰ ሚኔንከሰ ህከረንገ እንጋንከሰ አቶበእረ እቅ፤ እሱን ሬሆች ኬእ መሲሂን ሜጡበ ኩሜ ዘመኒሃ ዋመ እኮኡ።

⁵ ጠዉ እኮጎሬ ዋሉ ሬቶ መኑ ኩሜ ዘማኑ ጎፎተ ኢላ ሬሆች ኬእበእ፤ ሁኩን ወዕኔሃ ሬሆች ኬኡሃን።

⁶ ዋዕኔ ሬሆች ኬእ ወጥ ደእታሩ ማሰክንቶእረለክ ጠሊላኖተ፤ መሰንትሰ ለንክ ሬሁት እሰ አሌን ሹምነቱ ዮሰበእ፤ እሱን መገንለክ መሲህ ቂሰተ እክ መሲህን ሜጡበ ኩሜ ዘማኒሃ ነገሳኡ።

ሻይጣኑ ቄለሙሰ

⁷ ሁኩ ኩሜ ዘማኑ ጎፎች ኤተሮን ሻይጣንቹ ኡሱርች ሂረመኖ።

⁸ እሱን ኣዲንያ አሌን ዮ ኡመት ጉዕመንከ ጎገለክ ማጎገሃ ሉሲሶተለክ ኦሊሃ ቅጥ አኦተ ፋላኖ፤ እሰ ዋሊንሹንኩ ባር ገበላን ዮ ሸፋሪያ ጌሰ።

⁹ እሱን ኡለ አል ጉዕመንከ ሆርት ጠሊላኖ ቀአተለከ ኢተንቶ ከተንቹተ ረቦኡ፤ ጠዉ እኮጎሬ ሰሜች ገረት ድርት ቡሰት ሹልቶሰ።

¹⁰ እሰተ ሉሲሾ አልቢሱ፥ ቡሳዊቹለክ ክዘበኙ ነብዬቹ ዮ ቤቹ ዲን ዬኖ ቡበኖ ባር ኣዜን ቶረንቶኡ፤ ህከኔን ሀንከዕርተለክ በራሃ ዘላለሚች ዘላለመ ኢላ ኦርጨቀንታኡ።

መጨረሻ ፍርድተኔሃ

¹¹ ህከኒች ኤተሮን ሎረ ዋጁ ኬዕምኝ ቦርጭመተለክ ቦርጭመሰ አሌን አፋዕልዮኢሃ ለዕዮም፤ ብሬችሰ ሰሞሁለክ ኡለት ሁንቶኡ፤ ቤቹንኩ ደገሞሰበኡ።

¹² ህትን ቀቀዉለክ ሎርሎሩ ሬቶእሩ ጉዕመንኩ ኬዕምኝ ቦርጭመ ብሬን ኡርታን ለዕዮም፤ ህከንቤቾንን መጻፈንት ፈንተኦኡ፤ ህትን ዋሉ መጻፋ ሁኩንን ሄእ መጻፋ ፈንተዕዮ፤ ሁኩ ሬቶእሩ መጻፋን ከተበሞ ሆጎሰ ሃሊን ፍርደ ቶጎኡ።

¹³ ባሩንኩ ኣዜሰ ዮ ሬቶእረ ኣሴእ፤ ህትን ሬሁተለክ አዛቡ እሰ ኣዜን ሬቶእረ ኣቶኡ፤ መት-መቼንኩ ሆጎሰ ሃሊን ፍርደ ኣእቶኡ።

¹⁴ ህከኒች ኤተሮን ሬሁተለክ ጃንሙ ገረ ባር ኣዜ ቶረንቶኡ፤ ሁኩ ገረ ባሩ ለምቅተ ሬሁ።

¹⁵ ሱዕሙሰ ሄእ መጻፋን ከተበሞባሁ አዪሁ ገረ ባር ኣዜን ቶረሞ።

21

ሃዕሮ ሰማለክ ሃዕሮ ኡለተ

1 ህከኒች ኤተሮን ሃዕሮ ሰማለከ ሃዕሮ ኡለታ ለዕዮም፤ መሰንትሰ ዋዕኔ ሰሞለከ ኡለት ህጎኡ፤ ከኒች ኤተሮን ባሩንኩ ዮበኢ።

2 ህትን ጠሊለት ከተንቹት ሃዕሮት ዩሩሳሌም ጨውሃሴ መክቶ እዜቸገ ተቃጠብ ሰሜች መገን አዲች ድርተን ለዕዮም።

3 ህትን ሎረ ላገት ኬዕምኝ ቦርጭማች «መገን ገልትት መን በላን እኮኡ፤ እሰን እሳን ሜጡበ ሄእኖ፤ እሰን እሰ ኡመት እካእ፤ መገኑ ገወንኩሰ መገኑሰ እክ እሳን ሜጡበ እሀኖ።

4 ህትን አሌችሰ እንጂጃት ጉዕመንከ ሽንሸኖ፤ ህከኒች ኤተሮን ሬሁት ህከረንገ ሻዘነት ህከረንገ አልፋቱት ህከረንገ ኦሪሸት እካበኢ፤ መሰንትሰ ከኒች ብሬ ጠዉ ጉዕመንኩ ህጎኡ» ይተን ሞጭጭም።

5 ህከኒች ኤተሮን ኬዕምኝ ቦርጭመ አሌን አፋዕሌኢሁ «አን ጉዕመርቹንከ ሃዕሮ አኣም» ዩእ፤ ህትን እሰን ኤሳሃ «ት ላገት አመዕነሞኢሃለከ ሀንቅ እኮቤቹሃ ከተብ» ዩኤ።

6 ህከኒች ኤተሮን «አበቀዕዮ፤ ብሬሁለከ ኤተሪሁ አኔት፤ ሰገሶሰሀኒሃ ሄእ ዊ ቡቁተ ጠለዕል ዋግቤሉ ህትን አሳም።

7 ድለ አዕዮሁ ካን ረገእኖ፤ አንን መገኑሰ እሃም፤ እሰን ቤቱኤ እሀኖ፤

8 ጠዉ እኮጎሬ ዋጀታእሩ፤ አመዕነቱ ዮሰበእሩ፤ ንጃሶእሩ፤ ነብሳ ሸታእሩ፤ ዝነተ አታእሩ፤ ኪላኑት፤ ሸርክተ አታእሩ፤ ክዝበኛኑት ጉዕመንኩ ወጡሰ «ዲን» ዩኖ ቡባ ጊረ ባር ኣዜን እሀኖ፤ ሁኩንን ለምቅተ ሬሁ» ዩኤ።

ሃዕሮ ዩሩሳሌምተኔሃ

9 ህከኒች ኤተሮን ኤተር ለመሉንኩ መገን በለት ዊንቶ ለመለ ጠበትተ አፎ ለመላንከ መላይካች መቱ አሜች «አም! ሆልች ምኒ አመተ እኮ እዜቹተ ለሊሳንኬ» ዮን ጠወዕዮ።

10 መገን አያኒን መቶ ሎረ ቆተ አል ፋሽ ጠሊለተ ዩሩሳሌም ከተንቹት መገን አዲች ሰሜች ድርተን ለልሾኤ፤

11 እሴን መገን ኬዕምኚን ለሊሳእት እቅ፤ ትርሴ በለቁንኩ አበ ጤአተ እኮ ክንገ እያሰጸድ ክንገ እክ ለአቃንችገ በለቀኖሃ እቅ።

12 ህከን ከተንቹሃ አበ ቄራዕሩት ግንብ ኦተትለከ ቶን ለሙ ኡሩቲ ዮሴሃ እቅ፤ ህትን ቶን ለሞሃንከ ኡሮን ቶን ለሙ መላይከት ሄኦ እቅ፤

21:1 ኢሳ. 65፥17፤ 66፥22፤ 2 ጴጥ. 3፥13። 21:2 ኢሳ. 52፥1፤ 61፥10፤ መና. 3፥12። 21:3 ሕዝ. 37፥27፤ ሊዌ 26፥11-12። 21:4 ኢሳ. 25፥8፤ 35፥10፤ 65፥19። 21:6 ኢሳ. 55፥1። 21:7 2 ሳሙ. 7፥14፤ መዝ. 89፥26-27። 21:10 ሕዝ. 40፥2።

ህከን ኡሮ አሌንን ቶና ለሞሃንከ እስራኤል ዘሬ ሱዕሙ ከተበሞኡ እቅ፤

13 ህትን ሽርቂን ሰሰ ኡሩት ቅልቢን ሰሰ ኡሩት ከአጽን ሰሰ ኡሩት ገርቢን ሰሰ ኡሩት ሄኦ እቅ።

14 ህከን ከተሞ ግምብ ኦታተ ቶነ ለሙ ቀበቡ ሄዕዮሰ እቅ፤ ህከን ቀበብ አሌን ሆልቶ ቶነ ለሞንከ አሳበ ሱዕሙ ከተበሞ እቅ።

15 ህከን ኤሳሃ ጠወዕዮ መላይኬቹ ከተመ፥ ከተምሰ ኡሩተለከ ግንብ ኦተተ ብኬኖ ዋርቅ ቶሙ ሄዕዮሰ እቅ።

16 ከተምቸሰ ቅራዕርመሴለከ አልባዕልመሴ ቅጡ እክ ሾሌንኩ ሙረበሴ ቅጡሃን፤ መላይኬቹንኩ ከተመሰ በርቲንከሰ ብክሃን ቅራዕርመሴ ለም ኩምተ ሾል ጥቤ ኪሎ ሜትር * ጌሰ እኮ፤ አልባዕልመሰለከ ኡርሸሴ ህከን ጌሰ እኮ።

17 ህትን መላይኬቹ ከተምሰ ግምብ ኦተተ ኡርሸሴ ብኬእ፤ መላይኬቹ መን አንጋን ቅጡ እኮ አንገሰ ብክሃን መት ጥብታ ሸይልኔ ሾሎ አንገ ብኩተ እኮ፤

18 ግምብሰ ኦተተ ኦተንቶኢሁ ኢያሰጺድ ክረንት፤ ህት ከተንቹት ጡመ ለአቃንቸገ ዮ ነጠ ዋርቂን እጃረንቶአተ እቅ።

19 ህከን ከተም ግምብ ኦተ ቀበቡ አደደ ጤአተ እኮ ክን ደረን መክዮሃ እቅ፤ ዋኔ ቀበቡ ኢያሰጺድ ዬኖሃ ክኑ፤ ለምቂሁ ሰንፔር ዬኖሃ ክኑ፤ ሰቂሁ ኬልቂዶን ዬኖ ክኑለከ ሾልቂሁ መርግድ የኖሃ ክኑ።

20 ኦንትቂሁ ሰርዶንክሰ ዬኖሃ ክኑ፤ ሌሀቂሁ «ሰርድዮን» ዬኖሃ ክኑ፤ ለመልቂሁ «ክርሰቲሎቤ» ዬኖሃ ክኑ፤ ህዜትቂሁ «ቢረሌ» ዬኖሃ ክኑ፤ ሆንሰቂሁ «ወራዉሬ» ዬኖሃ ክኑ፤ ቶንቂሁ «ክርሰጽራሰሰ» ዬኖሃ ክኑ፤ ቶነ መትቂሁ «ያክንት» ዬኖሃ ክኑ፤ ቶነ ለምቂሁ «አሜቴሰጢኖሰ» ዬኖሃ ክኑ እቅ።

21 ሁኩ ቶነ ለሙንኩ ጡፋ ቶና ለም ደረን እጃረሞሃ እቅ፤ መት-መቱሰ ጡፋ መቱ ዕንቁን † መክዮእሃ እቅ፤ ከተምሰ ዋቆ ለአቃንቸገ ለሊሰኖ ነጠ ዋርቂን እጃረሞሃን እቅ።

22 ጉዕመንከ ኦታለኖ ቀርቹ መገኑለከ ሆልቹ ህከን ከተማን መገን ምኒ እኮቤቹሃ ከተም ኣዜን ዋሉ መገን ምኒ ለዕዮምበአ።

21:13 ሕዝ. 48፥30-35። 21:15 ሕዝ. 40፥3። * 21:16 2,400 ኪሎ ሜትር ጌሰ እኮ፡- የኖህ ግርክ መጻፋን 12,000 እስታድዮ የኖ፤ 1 እስታድዮን 185 የኖሁ ከተበሞኡ። 21:18 ኢሳ. 54፥11-12። † 21:21 ዕንቁ፡- ዩ ባር ኣዜን ዮ ቡዳሜ ኣዜን ጨለገ ዮኢሃ እክ ኣዜንከሴ አደደርቹ ዩንኩ ሽፋርገዮርቹ ኣግ ቀሰኖሴቢቹሃ ቀሰኖሴሃ ከዕምቶተ ይት ኦታእሃ ኮቡ።

23 ህክን ከተማን መገን ኬዕምኝ ኑሩ ለሊሰኖሰቤቹሃለከ ሆልቹ ገወንኩስ ኑርሴ እኮቤቹሃ እሩ ህከረንገ አገንቹ ለልሶሴተ ሀሰሰኖሴበእ።

24 ኤመቱንኩ ኑሪንከሴ ፈንቀላንታእ፤ ህትን ኡለ አል ዎመት ኬዕምኝስ ከተም አዝ ኤባእ።

25 ህክን ከተማን ሀንከዕርት ዮበእቤቹሃ ኡራከሴ እኮሰበርሃ ጡፈንታበእ።

26 ኤመት ዎመ ሎርመተለከ ኬዕምኝ እሴቤቹ ኤባእ።

27 ጠዉ እኮጎሬ ኮፍዮርቹ እኮ ጠዉ ሆሮ እሴቤቹ አገኖበእ፤ ንጃስ አእኖሁለከ ክዝብ ጠወአኖ ሆሮ እሴቤቹ አገኖበእ፤ እሴቤቹ አጋሩ ሱዕሙስ ሆልቹ ሄእ መጻፋን ከተበንቶእራን።

22

1 ህከኒች ኤተሮን መላይኬቹ መገንለከ ሆልቹ ኬዕምኝ ቦርጭማች ፋለኖ ለአቃንችገ ለሊሰኖ ነጠ እኮ ሄእ ዉሁ ዛዘኖ ዋሃ ለልሾኤ።

2 ሁኩ ዛዘኖ ውሁ ህክን ከተም ዎቃሃ ለሙብ አዕይ ህገኖ እቅ፤ ህክን ዛዘኖ ዊ መኬ አዲንለከ ጉረ አዲን አገናን አገናን ላለን ዘማኔን ቶነ ለሙ ወክት ላልቹ ላለኖ ሄእ ሀቁ ሄዕዮ እቅ፤ ህክን ሀቅቶ ኤመቱ ሀበረስ ፈይመተ ደኦተ ደግለሸቀመኖ እቅ።

3 ከኒች ኤተሮን ቦሮሩ ሆሮ ሄእኖበእ፤ ከተማንከሰ መገንለከ ሆልቹ ኬዕምኝ ቦርጭመት ከተምስ ኣዜን እካእ፤ ካዲመሰን ሰገዳስ።

4 እሰን ሚንሰ ለኣእ፤ ህትን ሚኔንከሰን እሰ ሱዕሙ ሄእኖ።

5 ከኒች ኤተሮን ሀንከዕርት ሆሮን ሄኣበእ፤ ቀርቹ መገኑ ለሊሰኖሰቤቹሃ ኩራዝ ህከረንገ አሪ ኑሩ ሆሮን ሀሰሰኖሰበእ፤ እሰን ዘላለሚሃ ነገሳእ።

ኢሰ ፈንቀል አሜትሰተኔሃ

6 ህከኒች ኤተሮን መላይኬቹ «ኩ ላገት አመዕነንቶአተለከ ሀንቅታን፤ ነብያከተ ጠውሲሰኖ ቀርቹ ቀዎ ወክቱን እሆኖ ጠወ ካዲማተሰ ለሊሶተ መገኑ መላይኬቹሰ ሶኮኡ» ዬኤ።

7 ኢሰን «አን ደዕል አሜታም፤ ከን መጻፍ ራግ ላገተ አገረኖሁ ማሰአሞእሃን» ዬእ።

21:23 ኢሳ. 60፥19-20። 21:24 ኢሳ. 60፥3። 21:26 ኢሳ. 60፥11።

21:27 ኢሳ. 52፥1፤ ሕዝ. 44፥9። 22:1 ሕዝ. 47፥1፤ ዘካ. 14፥8። 22:2 ክል. 2፥9፤ ሕዝ. 47፥12። 22:3 ዘካ. 14፥11። 22:5 ኢሳ. 60፥19፤ ዳን. 7፥18።

8 እን ያህይ ገወንኩአ ህከረ ለዕዮሚሁለከ ሞጮጬሚሁ፤ ህከ ጠወ ለዕዮምለከ ሞጮጬሞ ወክት ህካን ለሊሾኤ መላይኬቺሃ ሰገዶተ ሎከሰ አሌን ኡቦሞ።

9 ጠወ እኮጎሬ መላይኬቺ «አጉር! ካን አቶት፤ እን ኪን፤ አመክ ኦሶንለክ ነብያካን ሚጡበ ከን መጻፍ ላገታ አገርታ ነብያካን ሚጡበ ካድንቸሃን፤ አት መገኒሃ ሰገድ» ይኤ።

10 ህትን እሰን «ወክቱ ኢሌቤቺሃ ከን መጻፋን ዮ ራግ ላገተ ማተቢን ጡፎት።

11 ከኒቶ ኤተሮን ሂሉ ህልማንተሰ ቀጠሉን፤ ንጃሾንኩ ንጃሰ እሁን፤ ነጡንኩ ነጠ እሁን፤ ጠሊሉንኩ ጠሊለ እሁን» ይእ።

12 ህትን «አን ደዕል አሜታም! ጉዕሚንከሰ ሆጎሰ ጌሰ አሳም ዋገ አፎም፤

13 ብሬሁለክ ኤተሪሁ፤ ወዕኔሁለክ መጨረሺሁ አኔት» ይእ።

14 ሄእ ሀቁቾች ላልቹ እትሃለከ ኡሮንከሴን ከተመ አጎተ መብቱ ሄኦሰተ ኦድኑሰ ሜጭቶእሩ ማሰአንቶእሩን።

15 ጠወ እኮጎሬ ዉሽገ ንጃሰሳሩ፤ ሲረ አታእሩ፤ ዝነተ አታእሩ፤ ነብሳ ሽታእሩ፤ ሽርክተ አታእሩ፤ ክዝብ ኢትታእሩለከ ክዝብ ዋቄን መርታሩ ጉዕሙንኩ ከተሚች አብል እካእ።

16 «አን ኢሰ ከ ምሰክርነቱ አሶህዕኔተ መላይከኤ አመዕናኖ ጭምት ዱእ ምናተ ሶኮም፤ እን ደዉዴ ጠጽሃለከ ዘሬሃን፤ ለሊሳ ሱጼ ቤዜት አኔት።»

17 ጠሊሉ እያኑለከ እዜቹንት «አም!» ይታእ፤ ህትን ሞጮጬኖንኩ «አም!» ዩን፤ ሰገቦንኩ አሜቱን፤ ሀሾንኩ ሄእ ዋሃ ዋግቤሉ ህትን አጉን።

18 ከን መጻፍ አዜን ከተበንቶ ራግ ላገተ ሞጮጬኖህኒሃ ጉዕሚንከ ጠረኝሽ ኩላም፤ አዪሁ ከን ላገ አሌን መቱርቹ በርጌጎሬ መጻፋን ከተበንቶ በለተ መገኑ አሌሰ በርገኖሰ።

19 አዪሁ ከን ራግ መጻፋን ከተበንቶ ላጋች መቱርቹ ጤዕይሾጎር ከን መጻፋን ኩለሞ ሄእ ሀቅ ላልቹች ጠሊለ ከተንቾች መገኑ ወጥሰ ጤዕይሰኖ።

20 ከን ጉዕመርቹንከ ምሰክር እኮሁ «ሀንቅንከ ደዕል አሜታም» ዮኖ።

አሚዕን! ቀርቾ ኢሰ አም።

22:11 ዳን. 12፥10። 22:12 ኢሳ. 40፥10፤ 62፥11፤ መዝ. 28፥4፤ ኤር. 17፥10።

22:13 መና. 1፥8፤ 17፤ 2፥8፤ ኢሳ. 44፥6፤ 48፥12። 22:14 ክል. 2፥9፤ 3፥22።

22:16 ኢሳ. 11፥1፤ 10። 22:17 ኢሳ. 55፥1። 22:19 ዘዱ. 4፥2፤ 12፥32።

21 ቀርቾ ኢሰ ኣሰቱት ጉዕሚንከክዕኔ * ሜጡበ እሁን፤ ኣሚዕን።

* 22:21 ጉዕሚንከክዕኔ፡- የኖሁ መት-መቱ ሉህ ኪታበት «ጉዕሚችን» ይተን ዋሉሰንገ «መገን ኡመቲች» ይታኣ፤ «መገን ኡመቲች ጉዕሚችን» ይታኣሩ የኡ።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d